

四
行
集
仁
錄

丁亥秋
陈珩



六

皇明四朝成仁錄卷十一

屈大均原著

葉恭綽校訂

反正諸勲死事傳

反正諸勲死事曰姜瓖曰金聲桓曰李成棟

姜瓖榆林人崇禎十七年甲申二月瓖為大同總兵以城降賊賊挾之同犯京師自成既敗十二月清英王從保德州渡河孤山黃甫川東路諸堡皆爭迎附從鎮川溝南取西安分別部唐通姜瓖諸師狗榆中明年正月賊權將軍高一功拒戰於常樂敗奔響水瓖追至波羅又大敗之一功遜去瓖以二十騎乘夜馳還大同奪城而入一呼響應

遂斬賊制將軍過天星名張國忠者復稱崇禎十七年以
令四方會敵至瓌倉卒不備復降為大同總兵戊子冬十
二月乃建義旗奉永曆二年正月初一時山西豪傑並起爭
殺守令以應前副將劉遷起代扼雁門關為瓌號召瓌遣
將姜建勳南下與敵戰於忻州不利明年三月從靜樂西
山下取汾從汾而上將攻太原遇敵端重王於赤橋大戰
而敗保晉祠堡水草乏絕以數十騎決圍出敵追及汾建
勳自經死餘眾潰散所得太原汾諸州縣復陷惟太谷不
下保德則瓌之將牛化麟所據被圍數月士卒殺之以降
時瓌以母老堅守大同不出敵為長圍以困之經半載城
中糧盡人相食其卒遂殺之以獻永曆三年五月事也劉

遷敗走入山堡自縊死初瓌兵西下敵延綏巡撫王正志更檄調延安
華駐兵黃河為遏截計敵延綏巡撫王正志更檄調延安
參將王永強協防清水營及黃甫川諸路會神木高家堡
諸義士田秉德

原注云一作真

張秀倡義擁舊將高有才郭毓奇

而府谷兵知義者又應之二月永強率兵馳一日夜突入
榆林屯凱歌樓下聲言姜瓌分兵過河已將歸守延安朝
華聞其西還有異志從徑路襲之至神木隘口被永強生
得之有才又已馳檄招榆林云大兵且至榆林遂下正志
死焉永強自立為延綏大元帥又召魚河故將平德為山
西總兵出攻平陽而留裨將謝汝德為延綏總兵有才時
據神木亦各自署官爵不相統攝永強勒兵至延安有才

亦出富平於是關中大震永強渡河攻蒲州拔之復渡河
至美原流曲敵巡撫黃爾信遣使走漢中求救於平西王
吳三桂及固山李某各以兵出棧疾趨三原三月大戰於
美原永強大敗奔石浦川自縊死四月有才遜至府谷據
城自固敵引兵屯於保德保德與府谷夾河而城府谷城
險峻據高臨下敵數渡河仰攻之弗克保德所處卑有才
數以巨礮下擊敵兵多死相持年餘明年二月府谷食盡
不降民婦女數千絳衣盛粧悉投河死有才亦投河死之
平德至汾州聞美原之敗退屯紫柏六月三桂兵次田莊
德逆戰大潰三桂遂進營於綏德之無定河口將屠榆林
以暴風雷雨而止德竄入葭州八月城陷復東渡黃河三桂

道將追及之德與壯士劉通宇斫殺數十人被執不屈俱死之永強吳堡人有才安定人環之初起永強有才與為首尾所向克復夾河血戰三路應援秦晉幾於全舉駸駸有席卷天下之勢環死而諸豪傑相繼戰沒悲夫

金聲桓字虎夫遼東衛籍嘗為左良玉諸將弘光元年五月率其所部隨左夢庚降敵是歲隆武改元七月襄皇帝有敕諭提督各路援兵掛討逆將軍印恢勦豫楚等處業管土司中軍都督府左都督金聲桓首者帝舜三苗之格周宣六月之師雖天行不廢五兵惟人龍可勝九伐蠢茲狡賊敢肆披猖廟社受其震驚神人為之共憤邇者誓師親討直驅口口於幽燕伐罪弔民先集貌貅於彭蠡爾聲

桓正氣摩天忠肝貫日樓開鎮遠先朝之召虎生威志渴

吞胡

胡字原缺據張本補

此日之范韓攸賴邗水朕識大將之面芝

山爾騰無敵之稱茲加爾文銜一品太保豫楚改為南京
爾其効順竭忠力為恢復造廬推轂早已結念於舊知礪
山帶河卽以相期於異日大度朕之天性善後臣之良規
汝其懋哉勗哉朕不食言特諭先是弘光元年六月楚將
謝騰雲白之裔兵亂江右屠殺吉安等處降敵敵遣聲桓
入南昌以永曆二年春反正遣使齎疏至南寧上封聲桓
豫國公王德仁口國公王德仁者本閩部裨將先降敵時
與聲桓同舉義旗者也敵固山檀拜攻之明年正月城陷
聲桓赴水死德仁被執亦死之論者謂南昌起事者宸涼

知取建業而不知防贛州聲桓知防贛州而不知取建業
皆底於亡然自聲桓反正其時孔有德耿仲明尚可喜三
裨王與噶喇額真方抵全州圖攻桂林以聲桓舉事念上
游聲勢不可不壯遂率兵還駐武昌以退為進而使檀拜
攻之

李成棟字廷貞山西人初為開封游擊與流賊戰不利率
兵隨高傑至高郵在後勁營為鎮守徐州總兵弘光元年
口月江北俱陷成棟南走既而降敵為嵩江總兵尋鎮崇
明貝勒使攻汀州邵武延平成棟先至上杭克之隆武二
年十二月與佟養甲絲漳襲潮降大盜陳曜遂破惠州日
用潮惠印符為文書郵至廣州報平安而選騎易裝馳三

日夜至廣州東門奪關而入其副杜永和得唐王偽稱紹武者養甲並執周益遼鄧四王盡害之成棟隨遣兵往南雄韶州下之親往肇慶又下之遣楊文甫張月往高雷廉三府閩可義往瓊州皆下之親往梧州廣西巡撫曹煒出降上幸桂林己又幸南寧永曆二年正月上在南寧江西金聲桓王德仁反正檄至廣州三月成棟遂以廣東來歸成棟本山西勳衛受國恩久降敵非得己其在廣州或傳其密閣中奉高皇帝畫像未審也然俘執忠節諸臣必盡禮待之為之咨嗟贊美人咸怪之又初破廣州時得印信五十餘顆於中獨取總督關防藏之及與養甲有隙會江西報至遂反正閏三月十三日下令去辮復衣冠為表稱

罪臣遣羅成耀詣行在乞降

明季南略卷十三云遺帳下投誠進士洪天擢潘曾璋李

綺齋表

並以總督關防上之上遣勳臣馬九功封成棟惠

國公授養甲兵部尚書養甲懼遂以兵馬盡歸成棟上命

高丘伯侯性往廣州築壇拜成棟為大將軍成棟大悅五

月成棟率師往南寧迎駕陸見時汗流浹背俯伏不能起

出語諸將曰真天子也上以其忠勇可託委以恢復中原

之任六月上發南寧遂幸肇慶封養甲襄平伯召掌左軍

十月成棟出師贛州州守將高進庫者興平伯傑之子也

江西廣東反正而進庫屹立其間堅不肯附王德仁約成

棟會攻之成棟方經理內事未遑出師比出師則南昌警

急德仁還軍自保矣成棟一攻不下退壁信豐南昌復陷

成棟數戰不利敵援大至懼廣州不固使浚治城隍築東
西二隅為兩翼南屬於江而修行宮迎駕十一月佟養甲
伏誅成棟出師時養甲屬其舊人蠟書通敵事覺成棟密
請誅之遣祭興陵於梧州舟至楊柳沙總兵張善追及之
養甲當燭夜棋聞有變按槍鎗口傷兵士數人善厲聲叱
曰公差矣公所殺宗室諸王忠臣義士以數百計一死有
餘辜乃吝惜若此耶養甲赴水善刀及其腹以屍還報越
四日乃暴其罪三年三月成棟大戰於信豐敗績遣諸部
先還成棟斷後甲重溺水死上痛悼輟朝親祭贈寧夏王

後廣州死事諸臣傳

後廣州死事諸臣曰馮耀曰郭瑤曰施輝然

馮耀字蒼玉

鄒案玉廣州府志作五

南海人世襲廣州後衛指揮使

鄒案番禺縣志作三科左衛指揮使

陞廣西都司

鄒案廣州府志作西屯局都司

隆武元年

同總兵焦璉生得謀逆靖江王陞富川副將上監國以擁

戴功陞總兵賜一品服俸永曆四年二月廣州被圍耀從

車駕幸梧州上欲使使宣諭敵平南王尚可喜靖南王耿

繼茂而難其人耀慷慨自請上遣之既至廣州守將江寧

侯杜永和止之勿往耀曰吾設不往則欺君吾今惟知君

之不可欺不知敵人之不可說也永和與諸將飲餞於鎮

海樓耀年七十餘鬚鬢皎然意氣凌厲引滿盡數斗謂諸

將曰從此出郊一里至越王臺卽是天山朔漢矣吾老矣
奮三寸之舌宣布天威但得丁零歸命亦何必蘇武生還
哉緋衣玉帶導鼓吹旌旗而出旣抵敵營宣敕云立轉南
來之甲旋為北伐之師封可喜為平南侯繼茂為靖南侯
二裨王大怒耀厲聲訶責諭以大義二裨王亦皆壯之欲
以檄使還說耀不從以劍擬之欣然引領執刃者欲去其
冠曰吾冠朝廷冠也頭可去冠不可去以手控冠坐而受
刃

鄒案廣州府志作丙戌廣州城破耀被執不屈死之

郭瑤字季文南海人祖盤延平府同知父邦英參將瑤生
而好武喜擊劍舞槊年十八走遼東塞督師袁崇煥愛之

題授守備

鄒案番禺縣志作海北都司

崇煥死罷歸隆武二年冬清督

佟養甲襲陷廣州兵引滿射之瑤以肘三落其矢被執見
養甲養甲故與瑤同事崇煥一見識之使為麾下都司瑤
偽聽命明年秋閣部陳子壯率兵攻廣州瑤為內應事敗
養甲以故人不忍殺反正後走行在所上書授游擊將軍
為某總兵旗鼓永曆四年春廣州被圍瑤與勳爵杜永和
等戮力死守城陷冠帶坐中庭酌酒以待兵入奮罵見殺
瑤故人崔應龍者燕人也時為廣中都司城陷入文廟謁
辭孔子縊而死有馬承祖者廣州右衛達官指揮守五羊
門城陷與子宗保宗仁同戰死

施燁然番禺人先世名滿者國初從征南將軍廖永忠征
南副將軍朱亮祖平定廣東有功授廣州前衛指揮世襲

輝然歷官副將為太子太師王化淳軍前昭勇將軍鄒案淳翁

山文外及番禺縣志作澄永曆四年廣州被圍分守西城十閱月城陷

巷戰而死家中男婦十餘從之十原作千據鄒本改子祚基五歲以

哭父亦死從子廷基以城陷被俘不屈死其從兄煒然從

弟煥然鄒案煒然從弟四字原缺據翁山文外及番禺縣志補永曆初同為護駕將

軍後為益陽王軍前副將鄒案陽字原缺據翁山文外及番禺縣志補皆以殉

難死予嘗為其兄處士焜然墓銘有曰國初勲庸厥有施

公南從朱廖底定番禺一官二舍世祿永豐鄒案永翁山文外作允

三百餘祀十九飛龍思爾一衛與子男同子孫何賴鄒案賴翁山

山文外所賴祖功自宜死國天寶始終鄒案寶翁山文外作空九世

昭勇將軍實忠西城困守哀創執弓巷戰殲敵血濺使宮

乃君之弟是曰孺弘孺弘者煇然之字也

屈大均曰前廣州之陷諸臣死者一皆廣州之人而他無一焉後廣州之陷亦然耀與瑤皆非封疆之臣封疆之臣當日皆安在乎其不死者豈以為非廣州之人乎然亦有燕人崔應龍矣聞是時有總兵蘇文光者不知何許人潛兵小舟作農裝往來慕德里巡司將謀襲敵敵遣數騎誘之文光棄舟追敵遇伏父子死焉亦廣州死事之一也又永曆三年冬十二月晦敵至南安偵知南雄虛實乘夜度庾嶺抵南雄遣使說降至再三總兵楊傑等不下疾攻之城陷敵殺傑及董洪信鄭國林等五人副將蕭起等二十四人是皆以死殉城者也其亦賢於杜永和諸人遠矣然

皆未知其何許人意

南寧死事諸臣傳

南寧死事諸臣曰高賚明曰楊禹甸曰梁雲昇曰張孝起

高賚明字孟良新會人天啓二年進士永曆四年繇河南道御史陞太常寺少卿從駕至南寧敵追急群官逃散賚明依依行在獨不肯去貧甚紕袍糠餌得疾痛哭以死年七十餘

楊禹甸字甸之號海鶴溧水人以貢生任國子監博士遷戶部郎中督餉南寧永曆五年十二月十九日南寧陷衣冠赴水死直立不僵土人殮之於袖中得二語曰有母不能養非孝有君不能事非忠末綴畢命詞一首

梁雲昇字超然一字諱穆

諱鄭本作淨

宣化人以舉人任工部

郎中南寧陷雲昇糾率義旅為保障所居喬板村敵兵卒下被執不屈以死其生為三月十九日其死亦然皆威宗烈皇帝殉社稷之日也人多異之雲昇與禹甸交好既死踰年同降神於喬板土人立雙忠祠祀之雲昇子振殉父難亦不屈死因以配享

張孝起字將子吳江人崇禎十三年特賜進士任廉州府推官城陷被執不屈反正後得出獄永曆元年從駕幸梧州遷兵科給事中兼掌吏科四年廣州被圍駕復幸梧州會十三營諸勳自楚戰敗入行在不法孝起疏列其罪直聲震廷有鄭國公高必正者闖賊李自成之妻弟也驕蹇之

甚叱孝起於朝孝起挺然不撓以大義責之諸勳率懾服
焉五年春駕幸南寧孝起奉命出為高雷廉瓊四府巡撫
四府陷乃入廉州山中復依靖氛將軍鄧耀於龍門島合
謀恢復會漳平伯周金湯移軍防城耀疑其并已攻之孝
起往來為之解紛耀不悅孝起遂往依金湯敵將栗養志
兵襲金湯金湯戰敗走上思州復走南寧孝起倉卒被執
逼令薙髮不從不食七日死之

屈大均曰自兩粵破陷以來忠義之士惟粵東為盛粵西
則絕無而僅有梁公雲昇其一人也三月十九日生之日
卽為死之日自甲申至今凡有血氣者莫不於此日哀痛
不忘梁公何幸而得死於此日也得死於此日卽謂之復

生於此日也詎不可哉喬板之鄉予未嘗一至若楊公禹
甸者又使南寧以之而重者哉

死孫逆之難諸臣傳

死孫逆之難諸臣曰楊畏知其先死於雲南者曰羅國

璫曰朱壽琳

琳張本作鍊明季南略卷十七同此

死於永昌者曰劉廷標

曰王運開別有傳死於各州縣者曰席上珍曰耿廷籛

曰冷陽春曰夏祖訓曰周柔強死於行在者曰楊鼎和

曰嚴起恒曰劉堯珍曰吳霖曰張載述曰楊同宣曰吳

麟

麟南略卷十五作晉

其後十八人者曰吳貞毓曰張鐫曰張福

祿曰全為國曰蔣乾昌曰李元開曰徐極曰楊鍾曰趙

虞禹曰朱議晁

晁明紀作集

曰李欣

欣張本及南略卷十六均作傾

曰胡士

瑞曰蔡縝曰鄭允元曰周允吉曰朱東旦曰任斗墟曰

易士佳其不在此數者曰雷得復曰朱斗垣

楊畏知字介甫寶雞人弱冠舉鄉試第一崇禎十三年以
特用歷官戶部郎督餉真定明年遷川北按察司僉事未
任補金滄道攝洱海巡道事弘光元年乙酉元謀土知縣
吾必奎反連陷武定祿豐楚雄諸群縣九月征南將軍黔
國公沐天波檄各土司兵會勦遂與土官祿永命龍在田
等擊破必奎平之畏知繇是以監軍留楚雄十二月朔凱
旋頒賞土酋沙定洲衷甲入謝遂作亂陷沒雲南連下迤
東諸郡勢張甚天波走楚雄畏知聞定洲西出與天波計
畫守禦之具未集曰公在楚雄賊以全力來攻城必破不
如西走永昌使楚雄得為之備賊西追則恐楚雄塞其後
留破楚雄則恐公從西來首尾牽制上策也天波從之定

洲至楚雄城閉不得入為畏知所紹遂去遣其黨王朝李日芳等分攻大理蒙化屠之畏知募奇兵邀擊於定遠廣通間屢敗之於楚雄堅壁清野檄調漢土兵馬郡縣多遙應者定洲恐斷歸路又聞迤東祿永命龍在田等各自為守因不敢遽至永昌還攻楚雄不能下畏知乘其懈出兵奮擊前後殺萬人賊稍稍引去東攻石屏不能下還攻寧州破之永命死至嶲峨土官王克猷走死在田在石屏大懼與其黨許明臣竄大理定洲既定迤東復攻楚雄分兵為七十二營每七營以一大將統之環城守濠為久困計畏知守益堅終不能下永曆元年丁亥張獻忠被射死於西充其義子孫可望等率潰兵奪重慶江絲遵義入黔在

田使人告急且勸其至滇可望因詐稱黔國夫人焦氏之弟率兵復讐雲南初苦定洲之亂皆延頸以望不知其為賊也三月可望等兵至雲南定洲解楚雄之圍禦之於革泥關大敗遁還阿迷州畏知追至昆明獲其黨張國用等磔之天波以兵屬馬俾調練各土司兵馬阮守諸隘可望破曲靖及交水皆屠之遂繇陸凉宜良趨雲南宜良知縣方興佐迎之賊喜不入城至雲南巡撫吳兆元等迎之巡按羅國瓌在曲靖被執不屈自焚死前通判朱壽琳以僉都御史奉命募兵於滇亦不屈從容賦詩死之可望等既據雲南分遣李定國徇迤東諸郡可望自率兵西出畏知禦之於祿豐啓明橋兵敗身中三矢赴水不得死被執踞

罵可望素重其人下馬扶之曰吾今已不為賊當與爾共
扶大明耳畏知瞪目視之曰果爾當從我三事一不用張
獻忠偽號二不殺百姓三不淫掠婦女不然有死而已可
望皆許之折箭與誓即日下令止殺畏知與可望抗禮無
一言相下每拂意輒以賊呼之可望畏其剛正不敢害竟
聽其言可望至大理龍在田許明臣迎降復致書天波如
畏知言天波遣子以道府印信報命永昌通判劉廷標推
官王運開俱不屈自縊死可望分兵入麗江悉取其數代
所蓄厚待天波子陰使劉文秀隨之疾馳奪蘭滄橋至永
昌挾天波與鄉官龔彞彞等及畏知皆至雲南姚安舉人席
上珍拒賊被磔死李定國至臨安定洲所部李阿楚拒戰

攻下之阿楚自焚死城被屠口死者八萬餘人聞晉寧有
變因大掠臨安而還過河西故御史耿廷籙不屈赴水死
至晉寧守者為昆陽人孔師程城陷漸去定國屠之并屠
昆陽呈貢歸化死者又數十萬晉寧知州冷陽春呈貢知
縣夏祖訓俱死之江川知縣周柔強率眾屯撫仙湖之孤
山定國遣兵往擊盡殲之於是迤東屠戮之慘幾與蜀同
而迤西獨免故楚雄人至今尸祝畏知云可望還雲南稱
平東王造印敕設官故御史任僕倡議尊可望為國主以
僕兼吏禮二部尚書鑄興朝通寶錢括近省田地及鹽井
之利俱以官四民六分收可望饒機智既據有全滇益自
尊大而其黨猶儕視之各僭王號不相下而李定國尤強

悍每事多扞格可望執而杖之定國怒自率所部往攻沙
定洲平之眾益憚定國可望計不遂苦無以制其下頗欲
假名號自尊畏知又屢以匡扶大明為言因遣畏知龔彞
等道貴陽入粵適武康伯胡執恭方奉命屯泗城州防滇
寇探可望意便宜招撫許以王爵可望悅執恭遂矯冊命
封可望為秦王密疏以聞可望率眾迎受亦具疏謝並修
貢物畏知等至貴陽為守臣所阻多方陳諭得達肇慶行
在朝上道可望歸順意為請封道臣袁彭年科臣金堡等
執不可謂祖制異姓毋得封王至袖納敕印請收畏知畏
知奏可望等兵馬盛強可藉為用何惜一大封號以收拾
人心而反自樹敵上是之許授公爵督師堵胤錫復請乃

封可望平遼王賜名朝宗不知可望已受秦封傳檄四出
矣畏知又固爭謂彼等已僭自王矣今一旦降號公侯復
降為二字郡王此純臣之節非所望於群盜也不如姑餌
之破格明恩猶可幾其用命於萬一且法有因革今疆土
已非祖宗之舊則法寧不可以變通乎權封之加以大國
責以蕩平亦猶祖宗之志云爾且臣已許之矣臣為祖宗
起見非為賊也弗聽詔加畏知兵部尚書提督川湖雲貴
軍務既還可望恥改封亦不受詔乃自稱秦王且禁定國
等勿受公爵定國等不悅謀遣畏知再行以請改封為名
因致擁戴之意時偽定北將軍艾策勲已死可望悉收其
部曲勢愈盛強四年冬兵出貴陽破定番侯皮熊兵於貴

筑北攻遵義忠國公王祥自剄死遂盡有黔中之地時滿
兵亦盡陷湖南及兩粵上幸南寧五年可望遣賀九義張
明志赴南寧護衛且脅改秦封大學士嚴起恒督師楊鼎
和給事劉堯珍吳霖張載述等抗論不允並疏劾執恭矯
詔之罪可望聞之使九義盜殺鼎和於崑崙關九義與起
恒議不合擊殺之於水中屍流三十里有虎負之置岸上
而去又殺堯珍霖載述及兵部尚書楊同宣兵科給事中
吳麟以洩其憤上不得已遂更授秦王冊寶可望復遣畏
知赴南寧覘朝廷舉動畏知因疏劾九義賊殺朝臣之罪
上留畏知入閣辦事可望怒使指揮鄭國執畏知上與痛
哭而別手賜金章鑄忠貞直諫四字畏知至貴陽大罵可

望取頭上幘擊之既下獄士民數萬哭聲震天乃出之黑
神廟任僕是時得寵可望生男僕乞加恩如皇太子例龔
彝亦希意啓陳十事欲租外增賦賦內編馬滇黔民甚苦
之畏知與力爭二人因搆畏知畏知度不免作絕命詞以
自見可望召詰前事侃侃不屈可望令杖之畏知呵曰朝
廷大臣誰敢輕辱有死而已罵不絕口遂死之定國文秀
皆與畏知善聞之益恨可望六年二月定國率所部五萬
餘人出靖州可望恐其遂擁車駕而東使馮雙禮馬進忠
等與俱因以相制更使鄭國遷上於安隆所改為安龍府
以范應旭知府事上在安龍益窮促密與內臣張福祿全
為國言秦王待朕無人臣禮朕欲發密敕使人馳賚西藩

行營冀出朕於險福祿等承諭口舉共事職名上許之遂命大學士吳貞毓撰敕以文安侯馬吉翔乃可望心腹先遣往南寧祭陵以林青陽充使封定國晉王召之迎駕復使周官再致誠款吉翔知之陰使提塘王愛秀聞於可望可望怒使鄭國佯縛吉翔於南寧令與行在諸臣對理實厚待之八年三月六日國與愛秀見上求索首事之人上曰此事朝內諸臣必不敢為數年來外邊偽寶偽敕頗多鎮臣尚宜密訪國等怒目而出至朝房械繫貞毓等引兵入宮執福祿為國宮中大震鄭國將貞毓等極刑拷訊貞毓言凡事惟宰相主持我約李定國還討可望是實何與諸朝臣事然吉翔已預報一十八人某主謀某草詔某盜

寶因羅織成案請上裁決上不得已付廷臣公同議擬刑
科給事中張鐫內監張福祿全為國凌遲翰林蔣乾昌李
元開給事徐極楊鍾趙賡禹御史朱議臬李欣胡士瑞郎
中蔡演鄭允元周允吉主事朱東旦任斗墟舍人易士佳
棄市貞毓以大臣賜絞皆慷慨賦詩慰安皇上而得上心
惻然於時朝野哀之皆稱為忠烈十八公云然定國得密
敕亟趨安龍護上遂入雲南得延正朔至於壬寅為十有
六年而上乃崩則十八公之功焉可泯哉外又有雷得復
者字七來南昌人以諸生起兵從金聲桓反正永曆三年
走肇慶行在授兵科給事中疏參大學士嚴起恒革職上
幸貴州追至武岡弗及安龍之難上為可望所困得復聞

之賦詩四十章縊以死年四十餘又有朱斗垣者字月生
崑山人官兵科給事上既入雲南可望遂反定國禦之軍
於曲靖可望總統大將白文選率兵歸定國斗垣奉使封
文選為王途過可望所遣龔雲南兵張勝武大定等不屈
被磔死此則十八公之外者皆忠烈之臣云陽春石阡人
祖訓嘉興人起恆字秋冶相廬人崇禎四年進士貞毓字
念劉宜興人崇禎十六年進士畏知死上以其節贈之某
官賜諡忠烈

屈大均曰楊公正直剛方兼資文武使滇黔得見大明天
日延國祚至十六年皆其功也公倘不死與諸勲戮力劬
勦其功名豈出諸葛公之下哉曹操不殺孔融不敢擅漢

融一死甚為漢重吾於公亦云十八公之死能救君父於
險難與唐之六臣並烈焉可誣哉

慶遠死事傳

慶遠死事曰龍韜

龍韜雒容籍原陽山人武舉人永曆初起義從定興伯何

騰蛟恢復柳州南寧慶遠太平四府封雒容伯

鄒案行在陽秋作義

寧伯尋晉侯孔有德陷廣西韜獨守慶遠不下單騎入黔乞

師孫可望使從晉王李定國還戰嚴關復桂林誅有德誅

鄒本有孔字晉王使提兵東守梧州晉王攻新會不克還滇韜

還守慶遠被困自經死

卷之四

...

...

...

...

...

...

...

...

...

...

...

廣東死事四侯傳

廣東死事四侯曰李明忠曰李元胤曰李建捷曰郝尚

久

久行在陽
秋作文

李明忠字蓋臣別號葵庵進賢人初遊京師與諸豪俊交
好慷慨談兵島帥毛文龍延致幕中甚尊禮之明忠時時
從其麾下孔有德取仲明二將飲酒酣嘯歌輒自負文龍
死有德等震懼東走滿洲邀明忠與俱明忠不可慷慨言
曰吾中原人當歸中原異地富貴非我願也單騎馳歸京
師上書言方略不報鬱鬱去之弘光元年二月督輔史可
法奏請遴選奇材勇略之士如武進士例考取得三百二
十人明忠第一初授廣東西山參將陞潯梧副將隆武二

年九月上監國梧州明忠奉命從總督林佳鼎率師問罪
廣州兵敗佳鼎死之明忠收集殘軍而還永曆四年命以
中軍都督府都督太子太傅提督廣東高雷廉瓊等處軍
務兼理糧餉聯絡義旅便宜行事掛寧武將軍印封海康
伯廣東既失敵靖南王子耿繼茂念明忠與其父仲明舊
交遺書招之明忠斬其使五年二月五日尚可喜遣其將
徐成功率兵向高州明忠接戰於陽江岾峒行在陽秋作
州提督李明忠兵潰岾口檄廣西總兵趙印選以狼兵三千來助敵連
斬三塞以入我兵多死進克電白抵高州明忠走保博白
山中副將王邦友黃魁馬進忠李光先監軍副使郭光祖
吳人龍等以兵降明忠勢益孤聚集散亡再走龍門島六

年八月繼茂將攻瓊州駐兵海康先是總督杜永和及博興侯張月等以廣東失守走瓊州至是明忠欲往從之永和因誘執之以獻繼茂待以父執時時勸降許以侯爵明忠仰天笑曰嗟乎繼茂吾與汝父別皮島時肯降心北向今分藩開府豈足道哉吾明室遺臣力盡而死夫又何言被囚七日遇害四月某日也

李元胤字源白浙川人本姓孫崇禎間副將陳永福駐兵浙川部將賈姓者開封人元胤幼孤無所依因往歸賈冒其姓中軍李成棟與賈善心悅元胤待之異常兒尋賈陣亡元胤歸成棟事以父禮開封陷從成棟走下邳軍事無鉅細成棟皆與謀議智計絕人弘光元年南京陷成棟以

兵降豫王使為嵩江總兵未幾貝勒將征福建調成棟至
軍隆武二年冬與佟養甲帥精騎二萬繇漳泉攻潮惠克
之遂襲破廣州明年粵中義師大起成棟摧鋒陷陣四應
不給精銳之師半殲於山圍水砦之間然嘗於私室中奉
高皇帝畫像家人不知惟元胤知之永曆二年金聲桓王
德仁以南昌反正檄至廣州元胤疾告成棟請舉全粵應
之成棟喜曰吾志也閏三月十三日原注云嶺表紀年作
十五日案東明聞見

錄作四月十五晨行在陽秋作二月
清廣東提督李成棟以肇慶內附

成棟下令復衣冠奉

正朔養甲為所脅亦奉表歸附稱臣上以元胤為錦衣衛
指揮使管衛事兼中軍都督府都督同知提督禁旅官旗
辦事宿衛乘輿成棟遂以大將軍率師度嶺初元胤依托

成棟數年皆以賈為姓至是反正成棟以老母妻子在嵩

江盡遭戮辱乃命元胤為後改姓李氏三年三月

明紀及行在陽

秋均作二月

成棟師次信豐敗績死之上聞揮涕罷朝二日贈

寧夏王而進元胤南陽伯元胤痛哭流涕固辭謂今日皇

上中興無人可用杖拭二三累臣而用之但云使過而已

今者名器已濫人人罪浮於功臣誠不忍乘先臣之亡以

為己利優詔再三乃勉受車騎將軍印然章奏文移猶署

原職人稱其識大體云四年正月南韶連喪上御龍舟西

幸留元胤與文安侯馬吉翔居守敵騎從間道趨從化將

向廣州總督江寧侯杜永和及總兵范承恩布政使江楨

副使戚元弼議棄城航海居民驚走元胤聞之親至廣州

賁永和等死守永和等乃還舟守禦二月六日廣州被圍
元胤與吉翔及宣平伯董方策慶國公陳邦傳兵部尚書
曹燁等督兵來援永和恐諸勳鎮分其權上疏止之元胤
不得已以舟師陳於三水敵攻之鏖戰數日勝負相當已
而元胤欲入城同守永和亦弗許鄭國公高必正率精騎
二萬自楚至行在自請擊敵元胤疏言請救必正出懷集
四會度清遠以斷敵人之後廷議以永和故卒不敢用處
之潯梧之間後以水土不宜二萬兵疫死殆盡元胤聞之
數遺書以責永和永和弗恤也十一月三日

明紀作乙卯五日行在陽

秋作初二日

廣州城陷元胤退還梧州先是上在梧州聞廣州
不守將幸桂林會桂林亦陷乃夜乘船西幸陳邦傳乘危

劫駕及後宮輜重元胤身先士卒擁護三宮上所御礮船
輕疾先至南寧元胤追之不及遂與海康伯李明忠避入
博白山中久之往來海上檄召舊旅乃為恢復之舉五年
二月至防城敵引兵圍之元胤單騎脫走為土兵王勝堂
所執行在陽秋云四年十二月孫元胤被獲於欽州既見耿繼茂不屈左右白梃
交下元胤厲聲曰刀鋸鼎鑊不懼懼白梃乎百計誘降皆
不答令謹事之一日敵人會獵元胤笑謂汝曹何不以我
為鵠而叢射之諸將不忍或譏其前亦曾薙髮曰我昔以
白衣參軍無關重輕今列爵五等為國大臣尚欲覩面求
生耶遇害時自擇三州之口令從者移置胡牀西向坐曰
我君在西也顏色怡然與弟建捷同日死五月八日事也

行在陽秋作六年三十有四一子五齡先數日殤諸將皆
年四月十三日年三十有四一子五齡先數日殤諸將皆
弔元胤顧喜曰我庶幾無身後之累也一女二歲令人投
之於海妾亦赴海而死

李建捷字敬赤真定人亦父事成棟而以元胤為兄為人
深沉有大略言笑不苟善騎射膂力過人信豐之役成棟
卒於軍中建捷將所部隸總督杜永和麾下廣州圍急建
捷數開門出戰身從烏騎數十直突重圍斬級懸之馬首
往來披靡以為常進爵安肅伯敵久頓堅城智勇俱困乃
借贖兵萬人為助而范承恩者陰與交通以西關礮臺與
之敵反礮擊城城崩遂陷建捷走梧州行在扈駕旋奉命
與元胤往來海南檄瓊州舊旅合兵恢復至防城遇伏覺

之已脫身登舟矣聞元胤被執乃還曰兄死我恐獨生乎
同詣敵營辭氣不少屈駢首死之


郝尚久本惠國公李成棟部將封新泰侯奉敕守潮州永
曆四年廣州被圍惠州總兵奉化伯黃應傑嶺東道李士
璉密書納款使往來說潮州尚久與副將沈時亦遣人納
印敵使尚久仍守潮州尚久年老性剛復與郭虎班志富
不和尚可喜因調尚久充水師副將以便節制而以劉伯
祿往代之尚久怒不受命遂舉兵奉永曆七年正朔時西
寧王李定國兵臨肇慶尚久與為聲援改署官府執敵知
府薛信辰囚之四月攻潮陽縣不克求助於國姓成功成
功遣兵至擊鷓汀背尚久拒之大掠潮陽而去閏八月耿

繼茂與哈木統滿漢兵及土兵號十萬攻之分駐城外
踰月以巨礮陽擊其西陰遣舟師登東城尚久奔東山寨
與其子堯戰敵不勝投井死潮州遂破屠

破字
疑誤

屈大均曰初惠國既薨諸將故比肩不相下朝廷無威望
大臣足以攝之者兩廣總督之任至數月未授惠國有親
隨戎旗三千最精悍自信豐還倡曰誰為總督視我所屬
而已中軍江寧伯杜永和啗以厚利許以三倍月糧三千
人歸之朝廷因授永和總督開鎮廣州當是時朝廷乾綱
獨斷若以南陽任之南陽秉其公忠勿矜勿怠使四向援
兵雲合水陸連攻斷糗糧而絕歸路敵雖輕入豈能久困
於堅城之下永和執海康以獻致南陽安肅皆不免焉而

己亦不克令終新泰隱忍待時卒以潮州舉義事雖不成
亦可以見三公於地下也矣



靖州死事傳

靖州死事曰林爾張

林爾張字四維惠來人父應選韶州學訓導爾張以崇禎十七年歲貢知天柱縣陞桂陽知州調靖州皆在湖南殘破之地撫綏有方以才幹著聞滇寇至靖守禦兩月不懈援絕城陷死之一家殉難十餘人民立祠以祀之

沅州死事傳

沅州死事曰李之駒

李之駒字某某沅州平溪衛人崇禎癸酉舉人歷任雲南羅平州至辰沅道敵至沅之駒冠服坐堂上曰死不避難臣職也被執遂死之

...

...

...

...

...

...

...

...

...

...

...

...

皇明四朝成仁錄卷十二

屈大均原著

葉恭綽校訂

廣東死事三將軍傳

廣東死事三將軍曰王興曰陳奇策曰蕭國龍

王興

潮州忠逸傳稱興為大埔人本姓黃後改王興

字電輝恩平人以殺讐亡命

易姓名蕭嘉音人以其短小精悍因訛呼為繡花鍼云初為盜任俠好施得諸惡少死力會御史達成璧以勤王兵至新興興眾疑而擊之殺五百餘人成璧厲聲責興以大義興聞之大驚曰此朝廷繡衣使者若輩無知至此奈何乃單騎造成璧伏地請罪遂迎成璧至其營張樂設飲三

日剗血為誓會有他盜謝寀者要掠高雷運餉數萬興執寀斬之護餉直詣撫軍撫軍異其事授以官繇是興以勤王為任成璧疏聞襄皇帝嘉之授以副總兵命成璧監其軍鎮守陽江陽春兩縣隆武二年冬唐王聿錡僭立密使人說興西出梧州邀劫三宮許酬封爵興以大義拒之廣州陷退保恩平山中佟養甲以書招降弗聽遣兵合攻興伏而敗之殲其將焉遂復恩平養甲謀使朱崖勦黎從合浦西走南寧犯駕興知之出攻羅定陽春以制其後而乘間襲復陽江遂攻電白無日不與敵戰敵甚苦之永曆二年李成棟反正上躡肇慶成璧上其功詔興入朝晉都督總兵官賜蟒玉還守陽江陽春恩平開平四縣四年春廣

州被圍詔興掛虎賁將軍印率兵同衛臣馬吉翔李元胤等赴援興次三水道遇敵斬獲百餘人奪餉數萬上之戶部廣州守將杜永和忌之過勿使前廣州再陷興退至陽江會永和亦至舟資器仗盡為所奪乃率眾至白泥塞尚可喜取繼茂二裨王招之興斬使焚書已復書曰朝廷用我以名我報朝廷以實朝廷用我以實我報朝廷以名今尺寸之土朝廷之名實在焉必生死以爭之敵遣重兵攻之踰兩旬力懈興以五百人分伏斬級千餘得馬騾數百七年五月復廣海衛城殺敵將一人八年九月西寧王李定國兵下高涼興為前鋒旁收諸縣從攻新會先登定國敗績興乃駐軍文安寨築壘建倉廩為持久計宗藩唐王

聿鎡郡王郾城興安及縉紳朝士多往依之興一過以禮
資給咸豐欲婚者為具羔鴈欲去者為具行李時車駕在
雲南出入海上詔使往來藉興為東道主又數使姪茂公
與黃珏假道交趾貢金銀布帛諸物上益嘉其忠十年春
可喜發兵三萬攻之以巨礮壞壘可丈蟻附欲登興掘塹
而伏奮火器飛礮石擊死精騎七千餘人又陰毒四山水
草密布竹筴蒺藜敵士馬飲者踐者輒腹脹蹄潰相持三
月凌海將軍陳奇策率師來援解去蠟表告捷上加興縣
伯十一年境內薦飢興散糧儲以賑敵乘我窘驅民夫十
萬水陸合攻文安地窪下四際涵田岡巒傾陷難以馳騁
遂張兩翼為寬圍邀斷出入欲以坐困我師久之城中食

盡興令兵民散出就食時升米二千錢鼠一錢百人雖飢
羸無有異者興私謂其弟曰城可恃而食不支天也我終
不降弟善撫諸孤以續先祀我死且不朽乃密斲大棺一
具藏之十二年八月城將陷可喜使使來招望日日夕興
令將士登陴嚴守自與妻張氏朝服及諸妾北拜謝恩置
酒相訣張氏與妾十五人皆縊死興舉火自焚比曉敵人
入視興與妻妾十七人骸骨皚然乃取所斲大棺合殮之
時興年四十五是役也敵之將卒死者三十餘人喪兵數
萬馬五百九十餘匹圍凡十有三月可喜義之迎喪葬於
廣州之河南而粵人題於碣曰皇明虎賁將軍縣伯電輝
王公偕同節元配一品夫人張氏十五庶夫人之墓云茂

公以參將同守文安既陷與監軍副使黃珏總兵鄭球參將李玉分據隔水南廳上下兩川相為聲援十四年七月隔水南廳亦陷茂公去雲南中道被執全髮不屈以死珏字磊嶙新會人初奉其大父兵部尚書公輔起兵新會殺敵知縣戰敗匿山中久之潛詣行在授兵部司務從西寧王軍理餉有方後入文安寨數為興奏事貢御物著有勤勞玉閩人興戎旗親將數有戰功全髮不屈死之

陳奇策字鴻石南海人初繇邑掾黎遂球薦之使為游擊羅明受記室從至贛州總督萬元吉授以守備廣州之陷佟養甲得之使管肇慶水師李成棟反正仍守羚羊峽口永曆二年冬朝議誅養甲陰令奇策於楊柳沙掩殺四年

廣州被圍奇策率舟師赴援與諸軍皆會三水為杜永和所阻不得進軍廣州再陷奇策退據下川而數往來虎門洋峙之間出奇邀敵屢有首功詔拜凌海將軍七年春西寧王李定國兵臨肇慶分攻四會廣寧並克之奇策率舟師應援將直抵三水渡軍以趨廣州敵以戈船扼大路峽口奇策攻之斬級千餘退還下川定國解去明年五月定國復至攻下高雷廉三郡嶺西盡復九月進圍新會奇策率舟師先大軍襲擊斬敵將蓋一鯤於江門焚其大艦數十又擒副將梁大力檻至軍前定國大喜使為水師都統屯江門柵築礮臺以絕聲援敵窘甚城中兵民相食會滿兵救至定國戰敗奇策仍還下川先是高州之戰敵總兵

郭虎敗走高明以眾三千乞降定國分置之奇策舟中虎
潛逸去奇策命諸軍圍殲其眾麋鹿劉良興來攻奇策設
伏擒之全軍皆沒十年敵攻文安寨奇策往救轉圍下川
大戰七日以西洋礮擊傷數百人敵退去奇策念下川彈
丸之地雖與隔水南廳海陵諸寨交連然密邇敵庭終難
以一鄉之地抗兩裨王全省之力聞靖氛將軍鄧耀在欽
州之龍門島孤懸海外界接粵西鄰交趾通滇南思與耀
合兵西附定國東通成功以張聲勢彼雖強盛終不能直
沒巨溟千里外以與我爭此藁爾因移師往與耀合耀高
州人隸海康侯李明忠麾下明忠死耀將餘眾保牙山牙
山陷乃走龍門龍門雖邊裔絕島獨存正朔衣冠避難者

多依之郡藩宗室部曹監司首領以下恒數十人有赴行
在上書者耀必厚資津送與海陵島之李常棠皆為詔使
出入東道主定國既敗餘兵多走海島上軍聲日振裝船
繕甲煮海屯田以為恢復之計奇策初至耀甚喜為治營
壘且資儲約為婚姻久之以嫌疑弗能和協耀乃具舟送
奇策往上思州道出南寧廣國公賀九義素聞其名待以
客禮使鎮永淳將聯絡土司出復欽州會敵犯雲南九義
退援行在奇策以孤軍難支仍返上思入十萬山中欲走
交趾敵總兵粟養志襲之倉卒交鋒士卒疲飢數百人同
日戰死無一降者部將數十人與錦衣衛指揮僉事葉英
欽州知州陳首功皆死奇策被執行至肇慶敵總兵董某

邀見執禮甚恭二禪王亦優待之奇策殊不為禮在獄一
年每日衣冠端坐臨命敵知府先具棺衾祭物乃迎之出
奇策欣然色喜方巾白袍雍容步履索胡牀踞坐笑而受
刃傾城感嘆咸私焚楮帛奠之十四年五月也英字千元
南昌人首功字起生建寧人中武進士

蕭國龍字沛卿陽江人初為虎賁將軍王興副將從興攻
復州縣視師閩部郭之奇疏其功教授驃騎將軍西寧王
李定國師至國龍請為前鋒力攻新會不克既退奉興令
分鎮永豐寨與文安犄角永曆十二年秋文安陷永豐被
圍國龍以眾寡不敵佯降敵既退遂約水陸義士亨峒陳
期新白頭蒲洪彪古城勞奏雷崗鄧雄雙水鍾良等同起

義聲四應可喜大發水陸兵遣繇上下川陡門海陵分路
夾攻遂薄永豐相持兩月敵益發大礮益馬步數千濟師
先克白頭蒞諸寨孤我外援國龍奮戰兩晝夜遂陷舉火
焚其家以餘兵保西礮臺或勸之降曰虎賁不得有文安
國龍豈得有永豐哉天亡文安所以亡永豐也今以永豐
並文安以國龍並虎賁天之所以亡我者不亡矣我妻子
已焚亦以並虎賁之妻妾十有六人也虎賁其望我矣其
弟國麟中箭死國龍遂赴水中軍余達子被執不屈敵援
其皮以死一時相羽翼者若期新彪奏及周祥黃忠與三
瀧黃涌之夏應昌雙水之梁逢秦梁國柄武定屯之王尚
忠雙龍之鄧允元錢崗謝邊砦之何亞武並上下官田之

壯健團練者率戰沒無遺我兵死者前後一千四百餘被
執二百餘蓋高肇兩郡接壤地與山深敵禁令有所難及
故我義徒得因緣屯集士民不削髮者得以乘間相依事
敗捐身甘心赴死忠義之盛固在炎海一隅哉

屈大均曰三將軍之起其地同其事同我不以列之於廣
東諸起義傳中獨表而出之者欲三將軍之名易舉易舉
則其事易傳也自中華陷沒君父三遭大變我廣東興復
讐之甲者凡數十家始於張文烈陳文忠陳巖野三公終
於虎賁王將軍凌海陳將軍驃騎蕭將軍靖氛鄧將軍四
公蓋自永曆元年至今凡十餘載大小諸軍所在血戰皆
所謂君子之師也豈嶺海之人獨蒙我二祖列宗之恩偏

厚哉靖氛敗後走安南剪髮為僧土人執以獻敵被殺我
不曰四將軍者以其剪髮之故也然其部將楊彥迪兄弟
自靖氛死猶擁余皇數十艘數敗敵因巡海大人於瓊海
中敵不能挫其鋒其餘諸將負險不屈鼓嘴牙山則有符
德義等那略則有黃國林榻則有口口通等大峴山則有
陸順明等或殺或執與眾數十人或數百人同全髮以死
寧不知一洲半島之不足以抗敵之廣土全疆白楛棘矜
之不足以當敵之強弓勁矢哉人而盡敵則天下無人矣
人何在在於一洲半島在於白楛棘矜死則人而生則敵
也噫

鄧耀高州人海康侯李明忠部將明忠死耀率所部保牙

山走龍門島獨存衣冠正朔人多附之李定國敗餘兵走
島中軍聲日振治舟繕甲煮海屯田為恢復計封靖氛將
軍北兵至以金帛結其麾下士卒皆走耀入安南剪髮
為頭陀大帥曰鄧將軍若在海島不能安靖也捕之急土
人執以獻不屈而死

靖氛雖以剪髮之故不與三將軍並列亦宜收入州縣
起義傳中不合竟遺之也為補錄於此

異姓親王死事傳

異姓親王死事曰李定國

李定國字一人初名如靖綏德人少為流賊張獻忠所掠獻忠愛其驍勇使與孫可望劉若錡艾能奇並為義子獻忠破陷四川僭號因號定國安西將軍可望平東若錡撫南能奇定北為四將軍與偽都督白文選馮雙禮王尚禮王自奇分統賊軍為八營隆武二年清肅王帥兵至西克襲殺獻忠定國等率潰眾奪重慶江平蜀侯曾英與戰敗死之永曆元年遂絲遵義攻入貴州會雲南土司沙定洲與妻萬氏叛陷據雲南黔國公沐天波脫走迤西定國等詭稱援師進屠交水及曲靖定洲逆戰於蛇花口大敗定

國等遂入雲南諸偽將欲推定國為主尚禮不從乃推可望號為平東王定國安西王若錡撫南王能奇定北王建四藩府毀呈貢昆陽二城為之而定國號曰西府云可望既為主乃自尊大使定國等皆從掖門而入執人臣禮定國不能堪倔强有言每事與之扞格可望與若錡等遂執定國於演武場數其罪杖之八十既復相與抱持而哭命定國取沙定洲以贖罪定國心雖憾之念相推奉已久無能抗也二年春與若錡率兵至洱革菴圍之生得定洲萬氏磔於市可望大喜然陰忌其功時加裁抑定國繇此與可望有隙可望僭據雲南脅執天波勒諸土司出兵輸餉兵勢張甚乃為黃屋左纛鑄興朝通寶偽錢造七曲篆印

設六部九卿科道等官稱國主然亦嫌名號不正無以厭服人心故洱海道僉事楊畏知者與可望善因導之歸命本朝為桓文事業明年春可望遣焦光啓定國遣潘世榮偕畏知馳赴行在獻南金文馬請得冊封親王奏下廷臣議大學士嚴起恒等固執不可上乃封可望景國公賜名朝宗如靖康侯賜名定國若錡秦侯賜名文秀能奇信侯賜名策勳畏知固爭弗能得六年二月定國自率所部五萬餘人出靖州時上在南寧可望恐定國擁上而東使馮雙禮馬進忠等與俱因以制之更使鄭國遷上於安隆所改所為府以范應旭知府事歲以銀八千兩米百石進御上及隨行文武口糧皆請於可望而後發應旭與提塘章

應科造冊內稱皇帝一員支糧若干皇后一口支糧若干
其大逆無道多此類定國至湖南連拔靖沅武岡諸州敗
清總兵張國柱於歐陽盡降其眾寶慶既復可望心嫉惡
之雙禮等與爭鹵獲益相搆可望疏請封定國為西寧王
劉文秀為南安王明紀作南康王定國不受可望陰使雙禮率兵
擒之不勝反為所擒可望恐仍善養定國家口於雲南七
月定國乘勝入廣西裨王孔有德迎戰於巖關大敗桂林
下有德焚死文秀亦率所部與白文選入四川裨王吳三
桂同固山額真侯墨勒根蝦聞報還守保寧文秀與戰大
敗單騎遯還可望奪其王爵九月定國取衡州楚粵間殘
兵舊將皆起而應之定國號令所及方數千里不復奉可

望約束矣可望率文選張虎等出沅州攻下辰州使人催
從定國進兵定國不聽遣高文貴乘勝東下敵將線國安
馬雄全節等潰走至梧州三戰皆敗復走封川定國盡得
其兵西粵全復安定侯馬寶永國公曹志建分攻臨武連
山皆復之鄖國公高必正率兵繼至攻復陽山定國又復
永川遣偏師潛至吉安亦復之江西大震方為下湖北計
裨王號敬謹王尼堪者與戰於衡州城下三日定國伏而
敗之馬寶慶戰甚力尼堪死焉已而定國亦敗退守武岡
可望再招之不聽明年二月明紀作三月定國復走廣西可望
親追之逼敵兵於花街子為固山佟圖賴所敗文選攻嘗
德亦敗可望乃命之還鎮雲南而自扼守貴州誅戮宗室

遺臣一時殆盡三月

明紀作夏行在陽秋同此

定國復從梧州東下遂

圍肇慶四十日而城不拔會桂林衛永復陷定國乃還與

敵戰於桂林總兵王之邦陣沒乃退保柳州可望又招之

不聽遣兵從古泥懷遠追之八年三月

行在陽秋作二月

定國走

至靈山還軍拒戰大破可望兵因復廉州至高州故博興

侯張月開城應之遂復陽春陽江恩平東安西寧五縣從

羅旁連灘出屯端江西岸別遣陳武渡瓊州攻復昌化臨

高九月

明紀作十月

定國至高明擒敵將郭虎杜豹遂圍新會

久之城中食盡略人為脯死者男女七萬餘人謂旦夕必

降按兵以待十二月清靖南將軍朱馬喇轟章京東拜等

率兵大至時定國分屯諸山於峽口列巨象紅夷礮為陣

別以勁兵屯左山為乘高驟下之勢敵憚其嚴整揮騎嘗
之左山兵敗走礮暗不發敵遂據左山揮步兵分攻峽口

與裨王尚可喜耿繼茂分兩翼進群象驚走自踧踏營中

陣遂亂定國走高州九年正月明紀作三月行在陽秋作二月退保橫州

敵追之復走南寧是時上在安龍已久日益窮蹙密敕召

定國封為晉王行在陽秋云十一年正月駕馭滇都遊李定國為晉王定國遂發南

寧可望使關有才禦之泗城州大敗定國未至可望又遣

葉應禎文白選疾趨安龍將移車駕入貴州上未即行明

年春文選陽為催促而陰遣人迎定國定國既至上及兩

宮相慶再生舉朝歡躍既陸見嗚咽流涕伏哭不能起留

一二日將奉車駕入雲南文選陽請小駐貴州上曰曲靖

滇黔之交也朕姑先移曲靖庶於滇黔可東西兼顧於是

文選先隨定國至雲南守將王尚禮將拒之劉文秀患之

陽與尚禮及王自奇賀九義等義明紀作儀密議守城自以數

騎馳見定國曰我輩以秦王為董卓但恐誅卓之後又有

曹操定國指天為誓文秀乃迎上入雲南倡言秦王尊上

我輩當尊秦王上因封文秀為蜀王艾能奇子承業為鎮

國將軍管延安王事文選鞏國公尚禮保國公自奇夔國

公九義保康侯馬吉翔仍以文安侯入閣辦事遣文選齎

敕貴州慰諭可望又封其所親張虎東昌侯使送可望妻

子賜虎金簪令從中開導虎見可望乃言上賜金簪令我

密行刺也明年可望既得妻子無復顧忌遂大言皇上負

義定國文秀謀反因遣文選鞏國公敕印繫之其偽署列
侯馬寶馬惟興等與文選謀反正言於可望曰文選受恩
有年在雲南受封屢辭不允勢不得已今國主重加爵賞
用為總統必然感恩圖報可望信之命偽興國侯馮雙禮
守貴州而封文選為征逆招討郡王總統兵馬可望親赴
交水進圍曲靖上命定國文秀禦之王師始至文選夜以
數騎來歸盡輸情實且言舊勳馬寶馬惟興等咸為內應
師至三空距交水二十餘里對壘未戰可望意雲南空虛
乃使偽臨潼侯武大定漢川侯張勝及馬寶夜以精銳四
千從尋甸間道猝襲行在可望自將擊定國九月十九日
接戰惟興等果為內應可望兵盡披靡逃還貴州全軍盡

降馬寶亦來歸惟張勝率兵直抵雲南已焚南關碧雞坊
尚禮復為內應聞可望潰敗將走楚雄與自奇合沐天波
覺之攜與入朝不得發定國聞報亟還過張勝于澤水塘
大戰竟日擒勝磔之尚禮服毒而死時文秀文選追可望
於貴州未至雙禮絕可望言兵已垂及可望急挈妻子奔
赴長沙雙禮斷後盡得子女玉帛以歸上封雙禮慶陽王
文選羣昌王馬進忠漢陽王惟興敘國公寶淮國公九義
廣國公其偽德安侯秋三品岐山侯王會荆江伯張光翠
等以黨附可望降爵有差已而文秀病死夔國公王自奇
永昌伯關有才等遂據永昌以叛定國率兵誅之可望既
降清得封義王因以滇黔地圖為獻請為滿漢兵先導十

二年二月吳三桂掛平西大將軍印偕定西將軍固山額
真侯墨勒根蝦絲四川入寧南靖寇大將軍羅託絲湖廣
入征南將軍固山額真趙布太絲廣西入安遠靖寇大將
軍信親王多羅鐸尼我叛臣洪承疇等攻貴州留守馬進
忠棄貴陽走九月五日

明紀作
七月

上命定國以招討元帥同

郡王公侯伯將軍等出師其銜曰欽命專征節制郡勳文
武提調官義兵馬賜黃鉞上方劍便宜行事師至安順扼
盤江屯雞公背示攻貴陽文選出七星關屯生界示攻遵
義以牽制之十一月三桂及沈應時馬寧等自遵義出文
選還守七星關三桂於水西得奇道絲天生橋抄烏撒軍
民府斷我歸路文選疾棄關焚可渡橋走需益定國以雞

公背戰敗聞多羅鐸尼中路兵大至亦還守盤江布太以
奇兵自泗城突出安龍抄我師之背定國禦之於羅炎河
大戰三日諸軍悉潰敗遂失盤江敵於是三路合兵收我
餘軍及戰象所至摧陷定國奔還奉上西幸永昌百官倉
卒悉隨幸是時十二月之望也上命文選留守玉龍關扼
永昌要路敵入雲南開國公趙印選衛國公胡一清土司
總兵龍世榮等皆降十三年正月駕至永昌二月敵會兵
鎮南我總兵王國勳與戰勝之文選與戰又勝之已而皆
敗國勳走死普淵淵疑為
洱之訛文選奔至瀾滄江燒鐵索橋敵
編竹籬以渡永昌隨陷上幸騰越敵渡江急追江瘴險惡
水氣毒淫敵多飲水死者定國扼磨盤山為柵數重節節

分伏使平陽伯靳統武護駕出三宣六慰以入緬甸布太
等以全軍來追及磨盤山麓遇伏而敗益進兵又遇伏敗
死者萬餘我秦安伯竇名望戰死定國復為火雷四十里
誘敵有盧柱生者泄其謀敵遂有備定國乃整軍而去騰
越以陷敵踰南甸追之軍至孟村為雲南迤西盡界乃還
上遂入緬定國與文選合謀恢復承制槩加土司勲爵使
為內應九月沅江土知府那嵩兵起復維摩州圍臨安府
全滇響應嵩為定國密傳敕印於諸土司於是延長伯朱
養恩與將軍高應鳳總兵許名世土司總兵龍贊陽等以
次反正與嵩合三桂統滿漢兵至石屏州攻嵩土司總兵
龍世榮率堵沐忠顯出迎盡以嵩謀告之遂圍沅江踰月

而城陷嵩與子那崙闔室自焚敵屠其城死者十萬餘人
嵩死定國勢孤遂走木邦文選亦走茶山上在緬既久定
國擁兵在外屢疏迎駕乃馬吉翔等苟安旦夕且苦跋涉
從軍請詔止之定國不得命兵至緬境去而復來者數數
緬亦盛兵禦之十五年二月文選疏至謂諸軍不敢速進
者恐開釁驚駕必諸臣奉上而出勢始萬全已作浮橋必
渡河矣詔又止之九月明紀及行在陽
秋均作五月緬酋弒兄自立以
計誘我文武諸臣自嵩滋王以下至皇親公侯伯部寺諸
曹內監盡殺之死者五十二人明紀作四十二人行
在陽秋作三十餘人十二
月三日緬頭目數人忽擁上及太子三宮出關獻敵敵奉
上還雲南十六年四月上崩太子亦遇害定國聞之日夜

哭移屯葫蘆山口將分東西二軍以屠緬甸而兵少糧空
諸將校率俘降且盡疽發於背慟哭曰萬古君臣之變至
斯極矣予能出皇上於安龍而不能出皇上於緬甸豈非
天哉豈非天哉予之罪無可贖矣吐血數升而死子嗣興
與劉震白文選遂出降敵明紀作十五年十一月白文選自木邦降敵封嗣興
歸命侯震歸義侯震文秀之子也



後貴州死事傳

後貴州死事曰皮熊

皮熊字玉山銅仁府人崇禎末為貴州總兵弘光元年封定番伯逆賊孫可望將犯貴陽繇敘州至永寧衛熊率部將楊光謙等襲敗之追奔三十餘里多所斬獲永曆元年上駐蹕武岡召熊入衛可望兼程攻陷遵義遂入貴陽上晉熊定番侯命提師還救至龍里三戰俱克可望走入雲南熊追至盤江弗及留兵守之既而武岡陷車駕幸廣西敵遂潛尾熊後抵平溪熊遣楊光謙鄧啓明楊登高等駐師清浪堵禦圍方急又遣武邦賢等駐思州以為犄角監軍都御史郭承汾駐鎮遠與敵大戰光謙被圍清浪城中

其繼室丁氏貴州人有膽略募兵黃平得三千人赴援敵

乃退鵠本作督師鄭逢元及承汾疏上熊功晉匡國公便

宜行事諸將加將軍丁氏賜名國祥拜壺毅將軍會遵義

駐鎮忠國公王祥縱兵四出假貿糧布給軍糧鵠本作煩擾

黔民熊懲其一二尤者尤鵠本作祥忿甚率三十六鎮攻圍

貴陽兩月熊撤清浪鎮兵入援撤鵠本作至油柞關大戰擒

殺祥兵十萬於河乘其潰敗復踰烏江索戰軍驕甚易視

祥兵日事飲博祥偵其懈急設伏舉火亦殲熊兵數萬於

江中於字原缺兩家兵勢俱喪可望乘虛遂踰盤江陷貴

陽追至平越大戰熊師再却同承汾走烏羅江司黑坡調

集將士以鎮帥張先壁壁鵠本作擁重兵捍蔽於外不設備

可望乃假道先壁使其將馮雙禮從間道執熊及承汾承
汾不食以死熊不屈可望縻繫之可望已破貴陽復分兵
北敗遵義祥與戰於烏江兵潰敗走林中縊死永曆十一
年秋駕在雲南可望稱兵犯闕既敗走所署偽文武官相
繼歸朝熊以間得脫上命以原爵鎮黔命下驛本
有熊字敵入熊
走水西大方城同水西土官安坤合謀恢復兵勢復振十
九年乙巳敵平西王吳三桂力攻水西熊退保楊保山中
被執奮罵不屈敵挫其頰齒牙盡落猶噴口血罵不食至
十四日氣將盡敵乃斷其首頸流白膏人皆以為異云同
死者凡十一人幕客舞陽人張藉與焉藉驛本張
本均作籍諸屍狼
藉郊外獨熊屍群鳥迴翔不敢近敵乃瘞之

屈大均曰前三原張公死事貴州予嘗愛其朝廷求死臣
之語以公之慷慨區區一孤城無將無兵委家口數十百
人以與封疆為存亡視張許之守睢陽不較難哉若皮王
二公之私鬪不忍小忿禍及邦家坐使寇讐拱手以獲漁
人之利何其愚也水西之役忠節凜然視同時諸將銜璧
累累甚而為敵用命反戈相向者相去何啻天壤哉

生員死義傳

內丘嶽傳原
缺據張本補

生員死義曰秦鎬曰楊應璧曰東肇商曰韓識曰楊于

世等四人曰王胤曰張國禎曰魚若性曰王鐘等四人

鐘明史潘

弘傳作鍾附余承蔭等曰張渭曰吳伯胤

胤明史避
清諱作裔

盧如鼎曰熊奕

奕明史本
傳作鼎

曰馮雲路等曰明睿曰鎮時

昌等曰白昭遠曰劉長庚曰張應泰曰梁文炳及弟文

燭曰許瑛曰顧所受曰張秉純等曰王台輔附石屋寺

僧曰王心翼曰馬純仁等曰徐念祖曰沈壽堯曰張龍

文等曰方授曰嚴紹賢等四人曰張廷章曰韓繹祖曰

鄧思銘等曰王毓著等曰傅炯曰陳渙曰劉泰兆曰曾

嗣宗曰王道行等五人曰鄒文鼎及弟文某曰睦本曰

林化熙曰葉尚高等曰李應開曰薛大觀及子之翰曰

沈士柱曰魏畊

畊續用上者
舊集作耕

曰錢纘曾曰丘嶽

秦鎬字子京汝寧人。生員性至孝。行誼卓然。為中州人士冠。威廟時與貴池劉城南昌萬時華兩應徵。辟皆不就。流賊陷城。奮罵求死。時年八十二。鬚眉皓白。偉衣冠。賊異其狀。不忍殺。鎬曰。吾以老而為賊所憐。吾之恥也。伯夷非天下之老者乎。不餓死於首陽。天下亦何貴有此老者也。遂絕粒死。自題墓石云。人間貧孝子。地下老書生。所著有頭責齋集。鬋園銷夏錄。嘗鬻宅得百金。以餉軍。有助餉疏及辭當事建坊疏。

楊應璧。河曲生員。流賊王家胤作亂。應璧率眾奮擊。面中

一矢為賊所脅墜城死

東肇商字雲駒華州生員敏而嗜學詩古文千言立就為人豪放不羈多玩世崎行崇禎七年闖賊至飲酒不輟所愛一妓力挽之同入華山肇商不從挺刃力鬪而死

韓識武功生員崇禎七年守堡禦賊堡陷挺棗木大槌當門擊斃數賊賊壯之不欲即殺識罵被磔而死

楊于世熊叶夢檀之櫬韓定美皆潁州生員崇禎八年正月十一日城既破潁州生員死者七十七人潁州衛生員死者二十六人而于世等最烈于世字子代

王胤字雲卿汝陰生員父參政某胤為人砥行抗名不下曲俗嘗建宗祠與族人興復古禮冠婚諸儀皆有法崇禎

八年賊圍城胤以善射守西南隅城陷賊故缺一面縋者皆從胤所守處下胤不去卒縊於樹而死生平喜為詩闢惠湖別墅以供嘯咏構築不給輒鬻他田宅以益之舍旁有廢塚或曰遷之便胤笑曰此亦鄰也何去為刻石作鄰墓記文多達旨所著有四禮摘錄枕流寤言

張國禎字蓋異臨潼生員從兄某講實踐之學兄貴為給事中國禎蔬食緼袍泊如也一夕有數十賊劫其父國禎奮刃赴之殺二賊救父以歸人稱其孝崇禎八年賊薄城國禎率其屬先去夜中雨雪曰不可獨存我家與其僕呼起黎明賊突至率眾捍禦手刃數賊相持至暮被執不屈死

魚若性字暢機高陵生員崇禎八年四月流賊至高陵得
若性悅其容儀壯偉請為魁率若性諭以朝廷威德被脅
不屈支解死

王鐘丁乙統

乙明史潘
私傳作一

張五美王之章

之明史潘
私傳作子

皆鄧州

生員賊至鐘自刺死乙統綠袍將巾持大鎚斫賊死五美
罵賊賊剔目鑿齒以箔卷而焚之之章口口口口口口
千戶余承蔭李錫及海寬傳彥者同鐘等守城城陷承蔭
巷戰死錫北向再拜曰臣世受國恩今耄矣不能手屠逆
賊願為厲鬼與寬彥俱不屈死

張渭字口口商丘生員嘗試居下等自袖其文爭之提學
潘曾絃曾絃曰子文誠善我粹未識也竟高拔之後數年

復袖其文爭之提學任贊化贊化怒黜渭薦紳先生有言
渭實名士乃復其故而渭亦且摧挫矣每醉謂人曰吾馬
周也天下方有事胡不用我天下且不知我文士烏能知
我哉或遂怒罵其坐客或醉而哭人皆以為狂崇禎十五
年商丘城破賊斫渭左臂及頤張且斷矣渭右手灑其鬢
血而以折臂手承頤徐步行吶吶罵不止又一賊從後斫
之仆而死

吳伯胤字延仲商丘生員美鬚眉善書為詩文溫湛有法
崇禎十五年城破被執賊以為官也繫而牽之伯胤抗聲
曰奴乃以吾為官我即非官豈從汝賊耶賊刃之以死弘
光初贈某官

盧如鼎字呂侯蘄州人生員生而奇穎卅歲善屬文為人
厚重質直內行修飾歲凶札輒傾困賑贍視置醫藥宗黨
多賴以全閭閻有爭相率就之平決片言折衷愧屈過於
要質崇禎十六年正月賊張獻忠陷蘄州令紳士冠帶自
東門入西門出悉斬之遂屠蘄州婦女被驅毀城稍懈卽
刈殺血流成渠如鼎時被執賊中有識者曰此善士舍之
寇退如鼎乃勒里人分布關隘為死守計如鼎分守南城
寇復來攻城陷遇害十六年二月也

熊雯字渭公號立齋黃岡生員淡泊寡營精心易學歲壬
午忽洞悟平生吉凶悔吝為卦運卦氣一書自一歲至二
十有五某年值某卦某月值某爻分儀比象毫髮不爽賊

張獻忠將犯楚，更居武昌，嘆曰：左良玉通賊，且不支吾，儒者不可以壞名節。悉以所著書授其弟藏之。比城陷，更先一日辭其友馮雲路，汪陞延曰：吾死矣，明日當於某樹下書熊渭公死所數字而死。明日更至某樹下，賊得之，欲授以官，不屈，遂投池死。越三日，僧熹雲者收之，顏色如生，手尚抱圖書，象云。

馮雲路，字漸卿，號畏菴，黃岡人。年二十餘，明史本傳作棄行年三十

諸生潛心理學，著孔孟真參左傳智定、周子通書及用書

百餘卷，巡按御史林某疏薦其才，明史本傳作崇禎三年巡按御史林鳴球薦其

賢，以用書進覽吏部某者格之，不得召。武昌陷，雲路於寧

湖寺駕桴入水，明史本傳作乘槎入寧湖同桴者聞岸上呼雲路聲急

且曰高官大祿無恙雲路曰生平讀死忠死孝之書不曾
讀降賊之書今日有清涼一口水而已遂自沉年四十六
汪陸延亦不屈死

明睿武昌生員城陷越三日賊令罷戮居人方喜更生睿
獨戒家人曰安有讀書識理義而待活於賊者乎從我者
入井不則去其妻及兩子三女以次入井三女明史本
傳作二女僕
婢二人從之睿焚香告天曰睿此時始無累矣為書數千

言榜於門告通國人士勿降賊隨入井死

鎮時昌江夏生員被執不屈死生員易為瑚者其父道暹
與次子為璉先罵賊死至是為瑚亦死

白昭遠字允哲臨潼生員崇禎十六年賊圍其堡昭遠糾

眾力守堡陷大呼曰性命為輕節義為重婦女宜悉入井
其女適韓嗣宗先入井死一時婦女死者甚眾賊執昭遠
殺之

劉長庚字醉白同州增廣生員崇禎十六年冬賊破潼關
卽約眾城守比西安陷賊遊兵薄同州官民逃迎者各半
長庚往辭先師廟焚冠下階曰長庚誓不敢以夫子之身
失之於賊也歸召族人與謀曰長庚無以報祖先今割城
內地五畝為祠堂餘地以作祭田族人揣知其意力勸之
長庚曰吾志已決次日傳賊大至長庚語妻党氏曰吾以
無子納姬人雷氏賴祖宗之靈生二子長者八歲次四歲
矣汝善撫之毋使喪失詩書乃沐浴望闕拜復詣先人廟

拜僭党氏至讀書樓前指一穴曰我死卽葬於此党氏哭
止之不答謂雷氏曰我死汝少將安歸曰願從君地下長
庚拜之執其手上樓手及焉並六歲女明史劉長庚
妾傳作七歲乃自
縊死

張應泰永壽生員崇禎末賊破縣堡手刃數賊以死
梁文炳及弟文燭皆靖邊衛生員崇禎末流寇破城欲招
致幕下抗節不屈罵以死文炳女亦投井死

許琰字玉重長洲生員崇禎十七年四月聞京師失守仰
天大慟比哀詔至哭臨畢卽投繯友人挽之復自沉胥江
水中曰吾懼不得死徧書崇禎皇帝四字於衣上籲天哀
號不食旬日乃死劉宗周有哭布衣許先生詩云先生一

死真無謂蓋謂琰也上聞其死贈五經博士今從祀旌忠祠吳人相率至祠而哭及祠所敵兵且壓境矣吳人亦哭之如初嗟乎哭許生者諸生也何其務於哭人而不肯為人所哭也聞南都陷時敵留洪承疇為江南總督有金壇諸生二人及閩諸生十三人道遇承疇大罵承疇使人擊殺之於笄橋十五人者曰我死骨磬於爾噫斯亦諸生之傑然者歟

顧所受字東吳長洲生員弘光元年五月聞聖安皇帝出狩南都隨失密謀起義既而江南盡降乃謁長洲縣知縣李實要之以死二十四日敵使徇蘇州所受服儒巾服哭投文廟沉泮水中死之顧苓曰兩都之變吳門以生員死

國者二人亦可謂節義之邦矣

張秉純字不貳含山生員甲申北都變聞誓欲死之或笑之曰一老書生亦何為者秉純曰然姑待之乙酉五月南都陷秉純遂絕粒不食或曰匹夫而死國難市井名也千載而下誰復知之且天心既如此矣死亦何益秉純嘆曰國家養士三百年今日其死所也如以為無益則古之忠臣義士皆捐軀於國破家亡之後有益者幾何人哉今日率天下之人無貴無賤無老無少皆宜為君父而死者也已不能死而輒笑死者為市井名此世之所以多亂臣賊子也家人進食弗顧子相泣曰大人不食一家當盡不食以死秉純曰兒輩能如是乎吾復何憾卒不食飢已死家

人生祭之哀請甚迫，啜水一杯而已。水中投有葎液，絕粒至五十一日，絕命詞成十章，乃死。其妻劉氏哭之，撫棺一慟而絕。明史本傳作氏一勺水不入口，閏十有六日至柩前痛哭而絕。是日同庠生徐正大聞之，亦感憤自經。和州戴重方戰敗湖州，裒創和其詞哭之，而以崇禎末湯文瓊許琰及正大為烈士云。

王台輔字元化，邳州人。太學生崇禎十七年國變，以死自誓。里中人笑之，閱數月未死，眾益笑之。台輔曰：「吾家有餘粟，故國粟也不忍以遺諸人，吾食既盡乃死耳。」一日向里中人曰：「粟盡矣，遂駕小犢車上載生平所讀書百卷、酒數升，乃如環者。」一奴子御之去邳五十里，至象山謂御者曰：「止之，勿行。」遂登山之巔，里中人從而觀者，猶竊笑之。其

友某設酒生祭台輔端坐受祭三奠爵三飲起謂眾曰自此別矣聳身以刀斷喉死眾乃大哭聲震陵谷越三日有一僧至撫其屍大笑曰死矣乎在此山耶越數日睢寧石屋寺忽有僧至仰天長嘆自經於佛殿中人爭視之則象山大笑台輔死者也卒不識其為何人

王心翼字贊明邳州生員生平寡合持論一軌於正三走京師上書為當事所抑人以為愚弘光元年國再變絕粒二日死遺命不葬淮南人為作奇節詩

馬純仁字樸公六合生員南京陷與其友約死其友背之純仁嘆曰死固不可以要人哉題詩衣帶曰朝華而冠暮夷而髡與死其心寧死其身一時迂事

原注云一作士

千古完人

其人伊誰樸公純仁投河而死有徽人程繼約者為太學生聞之亦投繯死繼約生平尚義數輸金以佐戶部人多稱之

徐念祖字無念華亭生員大學士文貞公階諸孫也弘光元年秋敵至聚子弟十七人慟哭謂之曰吾祖國之大臣清白傳家吾等奈何以身受辱於是闔門俱縊縱火於堂自焚

沈壽堯字景山宣城生員有膂力南都陷起義獨當前鋒力戰死

張龍文字掌霖武進生員乙酉夏率鄉民起義攻郡城事敗死之有吳福之者同事亦死義湖中福之字公介武進

廩膳生鍾巒之子也

方授字子留桐城生員國變為僧哭孝陵三日復走嘉興登東塙上哭以死

嚴紹賢字與陽無錫人董元哲字質明武進人徐懌字瞻淇項志寧字靖伯常熟人皆生員敵劫之薙髮紹賢與妻對縊元哲不食半月志寧觸石碎首懌遺筆言頭可斷身不可辱以一死報先皇帝存節義遂皆死之

張廷章嘉興生員從大學士徐石麒等起義既敗公服經死中堂

韓繹祖字茂貽歸安人修撰韓敬之子乙酉敵至江南歸安知縣某欲為啓迎貝勒王悉列生員於上繹祖不從因

作書上湖州知府乞除姓名知府以其書張明倫堂上掛冠而去後敵捕之繹祖逃入金壇山中一日遇宴會見伶人服本朝衣冠一慟而絕

鄧思銘字建侯建昌人生員崇禎十七年請合郡邑士大會於學宮置冊籍申監約月以朔望較射於學圃比耦進退中否多寡書於冊以聞陳技擊習金鼓坐作期而不至至而撓者罰如此則人皆習兵他時將帥才或出於此有緩急敵愾禦侮卽膠庠而具眾深然之下日請於郡有司有司笑曰庠可兵耶眾索然而散思銘鬱鬱不得志明年益王舉兵招思銘容其幕下建昌陷思銘兀坐不動被執大罵敵繫於竿射之思銘挺身受矢每發一矢必高聲呼

曰未中要害至六矢更罵曰汝何技之拙乎敵集矢如蠅
舉室殲焉無何敵兵入新城城中人欲髡髮以降諸生楊
應和聞而痛哭作詩有云髮膚猶是本朝人犬馬難忘舊
主恩族里誦之止輸城應和曰眾死於難無益也以吾一
身與敵可矣其族弟居久嘆曰壯矣吾兄可無與之共事
者乎遂偕就執敵欲降之應和居久大罵攫刃殉敵敵怒
始殺之兩屍立山中如擊鬪狀應和字惠生居久字若淡
皆建昌人與思銘為較射之約者也

王毓著字玄趾會稽生員南都陷敵兵入浙毓著作致命
篇並詩有身亡猶佩信公歌之句因與其師劉宗周約死
而以致命篇粘宗忠烈唐將軍琦祠壁儒中襴衫自沉於

柳橋下仍留書以促宗周有願先生早自決毋為倪鴻寶

先生所笑之語

明史本傳作毋為王炎午所弔之語

諸生數千人會哭於明

倫堂私諡曰正義先生建祠城東祀之魯監國贈翰林院
簡討廢其子越十有三年丁酉其友蔣平階魏芬等會葬
於山陰梅里尖之西阜而為文祭之曰嗚呼哀哉維我烈
皇在位十有七年死社稷兮後主繼立爰宅舊京庸讓賊
兮忘我大讐弛兵固戒黨禍亟兮躊躇其馬來牧我圉莫
鬪格兮我軍百萬化為豺狼反噬食兮三事大夫棄國而
走寡君執兮淮濱泗澣勾吳勁越獻圖籍兮先王命服玄
冠彤裳棄勿惜兮彼都人士辮髮毳裘盡戎狄兮有不若
者腊汝肝腦塗草澤兮矯矯王君邦之彥士未爵秩兮周

公之詩魯公之史竄聖則兮謂敵不可臣謂身不可辱心
如惕兮菟彼杞柳其下有渠清且澍兮士冠士服以沉其
軀情無極兮歎文言志作此好歌流金石兮此邦卿貳劉
伯祁仲死相得兮乃有壯夫拔劍北向刈蓬藿兮拜手天
潢揮軍監國踐宗祏兮君子知義小人敢死共戮力兮懸
軍千壘斬馘萬首摧強敵兮幾逐名王復我疆宇君之績
兮嗚呼哀哉天未厭禍人謝其祖國無良兮烽旗自偃戰
鼓不鳴敵反張兮建邦千里及菴而壞若亡羊兮君之故
里陷為讐國視龍荒兮斑斑沐椁殞在城隅實君喪兮歲
周其紀星復其次更大梁兮齒髮腐落骨肉朽敗魄銷亡
兮嗚呼哀哉君之死義兄弟妻孥等敝屨兮諡曰正義寵

以祠宮薄鴻毛兮今者不葬螻螻為食樂陶陶兮爾反未
達言求爾櫬度山椒兮曰是名丘梅福所宅實神臯兮曲
阿螻螻嘉木成蔭翳菁篠兮君魂戾止驟猿馭豹役山魃
兮律屈仲呂爰卜柔日在今朝兮爾車旣駕爾穴旣穿胡
次謬兮邦人諸友服爾名義涕泣交兮肆筵設席清醑在
壘具百牢兮望君之來靈衣控日振笙匏兮今君宅此於
萬斯年神孔昭兮嗚呼哀哉先是毓著旣自沉有布衣潘
集字子翔山陰人也為文祭之自署江東義士哀慟特甚
招其友痛飲於市曰王君死矣吾不可以獨生為絕命辭
數章袖二石及所著詩文踰女牆而出沉於渡東橋下時
年十有九監國贈禮部主事廕其子入監讀書然集未有

子也郡人私諡曰義成先生歷十餘年殞宮額毀骨且露
友人釀金葬於城南謝堡同時山陰諸生周卜年字定甫
為詩祭王及潘為文自祭摘所佩玉露圈捶碎紙裹外書
曰寧為玉碎遂投江死監國贈禮部主事廕一子入監讀
書遣官致祭是為紹興三義士云有朱璋者字鴻儒亦山
陰人聞敵渡江從父避居梅里尖墓所輒向壁坐泣下問
語舅氏曰吾得所往矣家人異而防之越數日故稱往蘭
若薙髮防稍懈遂反舍以堊大書几上寧為束髮鬼不作
髻頭人出望墓再拜投河死河深廣拯之無具旦且移家
項里父號哭河上曰家今去此吾其守汝魄以及於難乎
抑捐汝骨於此乎三終瑋躍而出角巾僵立引至岸不仆

年二十有四

傅炯字中煌諸暨生員丙戌六月敵至薙髮令下炯與同學五六人先約同死至期無一至者炯乃賦詩自沉於浣江

陳渙字連且安福生員甲申以後悉憤見辭色

悉當為悲字之誤

盡焚其詩古文避深林中丙戌避益深轉徙居高灘值袁州敵兵掠其地渙踞坐石橋見輒憤罵臨之以兵益憤罵以死殮之日見髮際出口三寸許豎起如指衣帶有全歸父母要捐軀之句弟藻字昭令與之同志授某州同知棄官遠引或曰亦以烈死

劉秦兆字方公寧都生員北都陷走南都上書不報日夕

痛憤為人性簡傲特為岸異喜駁議古今人物烈皇帝崩
秦兆為檄文徧謁當事請興兵復讐言卒無所合贛州陷約
里人為大全會欲以激奮忠義事不集徙居釣峯敵兵過
其地鄉人盡走秦兆獨儒生巾服當門而立兵過叱曰汝
何人曰我天朝廩生也曰何不薙髮曰薙髮非天朝人也
敵遂殺之

曾嗣宗字元聲寧都人大學士楊廷麟起兵嗣宗以生員
効三千金饗軍題授兵部主事從師吉安敗退保贛州將
入城為死守計廷麟謂嗣宗曰事急矣毋得從我嗣宗曰
與相公共國事久奈何乘危而去卒入城俱死

王道行字為公起義敗手刃妻妾而死王寵字二吉習文

鼎字象耳同破家起義戰死馬某字尊生赴王寵營中籌
兵敵夜擣之執至吉安慷慨請死啖以榮利不顧乃殺之
蕭某字建侯翰林蕭命官孫同楊廷麟起義屢立戰功被
土寇擊死拏山五人者皆廬陵生員也

鄒文鼎字子如弟文某字子賤都御史元標孫破家起義
敵執文某殺之懸其首道上復執文鼎仰見弟首大笑曰
我何時與汝同懸於此敵復殺之亦懸其首於弟旁吉水
之生員也

睦本字某某

明季南略卷九作字允立

丹陽人父明永上海教諭死節

本為生員以通廣西行在所被繫不屈觸階死賦絕命詞
曰父既死忠子當死孝千載一門不愧名教

林化熙字皞如福清生員城陷義不薙髮巾服如故海帥周崔芝據海口鎮東二城化熙潛往視之為敵所執親友持金帛求釋化熙揮之曰斯我効命之秋也敵私進剪刀令斷髮數莖堅拒不可械至福州化熙先詣文廟哭拜巡撫張存仁詰之曰髮膚不敢毀傷存仁曰爾書生不知時變為書所誤薙之斯亦已矣一介小儒顧安所得忠義之名耶使人與之小刀仍堅拒不可存仁曰爾既硜硜自守何不匿處山中而乃招搖市井以自戕寧得為守身孝子耶曰聞海鎮恢復有機因往觀軍容冀相等畫語已瞑目怒罵存仁不能堪令殺之至鼓樓前為思文皇帝行在地曰此大明門也願畢命於此五拜三叩頭坐而受刃

葉尚高字而立一字天章永嘉生員能文工詩歌城破義
不薙髮日荷一竿竿上繫一筆一鏡一帶一網巾示必竟
戴網巾之意高冠大袖招搖市上敵知府吳執之尚高曰
吾善詩卽吟曰北風袖大惹寒涼惱亂温州刺史腸何似
蜉蝣易生死得全楚楚好衣裳吳以為癡釋之丁亥春二
月上丁吳將有事文廟尚高持芹一束水一盂先往祭孔
子讀祝辭曰嗚呼天兮何忍嗚呼人兮何辜嗚呼斯文兮
幾於喪嗚呼吾道兮從而污吾師乎吾師乎曾泰山之已
頽而林放之不如乎讀罷痛哭失聲徬徨不能去被執大
罵就獄五月四日尚高謂人曰明日乃屈大夫懷石自沉
之日吾可以死矣沐浴整衣賦詩有未嘗蒲酒心先醉不

浴蘭湯骨已香之句旦日飲藥死有諸生朱維則者永嘉
陷衣巾自投孤嶼江中死年二十四樂清貢生章靖難聞
永嘉陷衣巾拜孔子廟躍入泮池死恭毅公綸之裔也

李應開字翔卿寧都人世居古下村以豪健聞會國變棄
諸生結客士之落拓不得志者多依之辛卯歲敵鎮將以
勦山賊道上鄉聞應開狀猝掩捕其家獲之繫獄使所知
謂之曰李生未嘗抗兵速薙髮明日赴鞠公庭稍自遜活
矣所知往諭意應開慨然曰諸君愛我良厚我非不自愛
人生早暮等死耳顧婉轉求生他日不自立死鹿鹿中悔
晚矣諸君願勿復言居數日庭藩應開踞地坐鞠者曰汝
何為作賊應開曰未也曰汝不作賊何不鬻頭應開曰汝

作賊乃髡頭耳鞞者怒牽出斬之應開坐而受刃

薛大觀字爾望雲南人其先當洪武中自無錫遷滇大觀與長子之翰並為生員有文名孫可望僭據雲南一時依附得官者甚眾大觀父子獨不屑上既至諸不事可望者皆以名節見重大觀亦恥自言城北有龍泉觀觀有黑龍潭其上為射魚樓兩傍竹木蒼鬱因紮家隱焉戊戌敵至朝議走緬大觀亟與其妻楊氏及之翰之翰妻孟氏並侍女瑣兒抱大觀幼子以行至射魚樓題壁上數語復書父子夫婦婢女姓名庚甲於左乃共赴潭水次日五屍相牽浮出幼子在婢懷中兩手猶抱如故大觀次女適鄒氏子者避兵西山相距數十里同日自焚

沈士柱字崑銅一字寄公蕪湖人父御史某為名進士善
知人嘗拔豫章名士黎元寬羅萬藻吳甘來甘來以忠節
顯士柱童子時性聰敏讀書十行俱下師事南昌萬茂先
為詩及古文辭諸老生皆以為弗過也與人交恂恂若不
見所能酒後議論風發往往屈其座人聽者忘倦烈皇帝
時大臣交薦不就徵比國家南渡阮大鍼柄國黨人獄興
士柱與周鏞為罪首鏞被殺而士柱以赴楚藩召獲免南
京既失破家結客座上言兵者嘗十數人癸巳以通西寧
王李定國連牽被執尋得脫歸丁酉復被執囚於南京者
三年作故宮詞以見意己亥延平王賜姓成功將帥舟師
至南京敵以士柱與交通殺之妻方氏不食五日死妾汪

氏鮑氏俱自經士柱獄中多著作散佚不存存者有土音集

魏暉字雪竇

續甬上耆舊集作原名
壁字楚白又別名楚

慈谿人國變棄諸生

志圖匡復所交皆當世賢豪士歸安以起義敗亡命走江
淮間妻子滿獄弗顧久之會解乃與錢纘曾閉戶思溪習
為詩一時吳越人士莫不傳誦又與張近道朱士樞交善
近道好黃老管商之術見詩人輒大唾罵士樞與暉論詩
近道亦罵之然三人相得其歡暉間上書延平王成功請
乘南風便直入京口己亥夏六月王果以戰艦千艘入至
應天既攻城弗克師退頃之暉復上書兵部尚書張煌言
備述敵情虛竇請以舟師再舉有孔孟文者從延平王軍

中至主畊畊嘗給其資用孟文以纘曾饒富有所求費不
厭於是以前所上煌言書首於敵帥畊及纘曾被執拷治
不屈遂駢死妻子田宅盡沒其友祁班孫以與畊交好亦
遣戍瀋陽畊故烈士平生以死國自許嘗有句云人生壽
命各在天須臾何必求相緩又嘗誦司馬遷之言曰匹夫
慕義何處不勉焉其志若此所著有思賢堂集

原注云逸
史作思息

錢纘曾字允武歸安生員少工詩清婉綿麗語必悲涼頓
挫令人流連宛轉不能舍家素饒慷慨喜周人急朱士稚
破產後父雷州太守年老甘旨之奉多倚纘曾而奸人孔
孟文利其財賄構成大獄致與魏畊同命悲夫

丘嶽字梁甫徽州生員生平任俠喜周人急寓居嘉興乙酉從魯監國於紹興紹興陷走福建行在福建陷走肇慶間關行遯終以全髮被執罵敵死

雜流死義傳

雜流死義曰拽梯郎君曰張餘剛及子鴻猷曰朱鳳曰
苗根千曰蕭承運曰陳新曰石電曰陳建靖曰李國愛
曰李可從曰耿景榮等三人曰李亮曰馬二曰孔四郎
曰鬻菜傭曰劉鳳池曰張日振曰百川橋乞兒曰總兵
家丁及提督營卒曰細柳街瓦匠曰靈谷寺僧及內監
姪馬二曰王莒卿曰歐敬竹曰石士鳳曰李玉奇曰湯
士鰲曰鬻麵人曰倪文徵曰王元振及弟某曰黃嘉縉
曰畫網巾先生曰桐鄉村人曰鄞縣樵夫曰黃賢曰馮
我賓曰簡夙興曰曾奉初曰樊泰曰李爾龍曰龐延曾
及子時倬曰覃騰龍曰徽三浮曰羽鳳期曰馬千戶

拽梯者不知姓名崇禎三年正月敵犯昌黎繫掠人民萬

計知縣左應選與士民嬰城固守敵急攻東門拽梯者為

敵昇雲梯至城下

昇亭林文集卷五拽梯郎君祠記作昇

登者數人將上矣

乃拽而覆之其帥礮諸城下積八日不拔

亭林文集作六日

引兵

退城得以全事聞擢應選山東按察司僉事丞以下遷職

有差又四年楊嗣昌以巡撫至始具疏上請邑之士大夫

皆保殺

保亭林文集作褒

民兵死者三十六人立祠祀之是拽梯

者請旨封為拽梯郎君立祠昌黎

張餘剛大埔人崇禎三年賊陳癩瘡掠湖寮知縣李秀實

遣鄉兵禦於三河以餘剛為選鋒餘剛力鬪死之其子生

員鴻猷往救手刃數賊亦死

朱鳳興寧人十三都巡司弓兵崇禎三年流賊半天飛者
攻陷司城鳳與巡簡俱被執巡簡匍伏乞哀鳳獨不屈賊
縛一日夜問曰汝護我否鳳曰我護兵不護賊賊遂磔之
苗根千河曲人鬻炭為業流賊據河曲流言官兵殺良冒
功以搖民心民惶恐不敢出城根千陰將制府諭帖徧散
城中賊覺將殺之根千大言於眾曰制府諭爾居民出者
生在城者死汝等宜速出城賊怒折其首
蕭承運汝寧人崇禎七年流賊至汝寧兵皆不戰獨承運
率眾力戰以死知府為文奠之予補其辭曰公非戰賊者
兮而戰賊者公兮戰賊而死公非死兮其死者戰公之賊
而不死者戰賊之公兮

陳新潁州人為畫工年七十餘有膂力善舞刀劍崇禎八年正月十一日潁州陷新持刀潛伏舍中賊入即被斫死凡斫死數賊賊率數十人入新復斫十餘賊乃死賊取其刀刀柄有殺賊報天子五字

石電嘗熟丐戶也崇禎八年流賊躡中都圍桐城電有所厚陳英從指揮包文達往援要電與俱電曰吾老矣不食軍門升斗粟英曰吾輩平居以君為眉目君不往是無渠帥也幸強為我一行電曰諾三月十日追賊於宿嵩我師輕進陷賊伏文達死之電英分左右翼大呼往救賊圍之數重電手弓射殺數人賊羣斫之頭斷猶僵立為擊刺狀良久乃仆

鹿樵紀聞云電單騎往救手斬數十人與文達俱死焉

皖人招其魂祀之

余忠宣祠

陳建靖蘇州人賣藥於洛陽市流賊陷城執之抗聲言大明天子尚在何不歸順賊怒磔之

李國愛陝西人從督師傅宗龍勦賊襄城與結義弟兄十人陷堅陣中國愛潰圍而出不見其九人者曰吾兄皆已戰死吾何忍生以所持弓與僕躍入冒死

李可從盤屋人少具大志好談兵以勇氣著聞關中無遠近皆稱壯士崇禎十五年正月闖賊犯河南督師汪喬年奉命討賊以同知孫兆祿為監紀兆祿素善可從挾以行使為百夫長可從謂其妻彭氏曰我此行誓不殲賊不歸立挾一齒授彭且拜曰倘相憶視此齒矣喬年師次襄城

會闖賊拒左良玉於鄆喬年使賀人龍及鄭牛二帥三路
進兵皆惟怯不戰而還喬年與兆祿策守襄城可從兆祿
此下疑後見可從奇之屬大雨雪城崩賊執喬年喬年大
有闕文罵不屈死尋執兆祿可從亟從賊伍中躍馬奮戈趨救旋
投戈以身翼蔽遂同死之至死猶抱兆祿不解云

耿景榮沛人包奇曹人韓從友清河人崇禎十五年十一
月敵兵犯沛有勇士三十餘人夜入敵營劫之短兵驟交
敵弓矢不及握馬柁屋樹不及乘遂大潰死者三之一其
勇士被殺者三人則景榮奇從友也沛人為之置祠

李亮華陰人王氏之僕也目不識書惟以僕勤事其主主
甚愛之崇禎十六年十月七日賊破華陰得亮見其偉幹

多力欲用為前鋒亮拒之賊出及以脅亮大罵支解之鹿
紀聞作韓生曰嗚呼亮可謂善取義者華陰從逆之士大
被磔死夫何如哉是亮有華陰非華陰之能有亮也

馬二不知其名富平人少孤貧為穿窬之盜西安陷二為
偽汝侯劉宗敏所掠愛其狀貌使為麾下小將二奮罵被
磔每刀一下宗敏輒問從否二曰不從凡數十刀皆應如
之至割其舌問尚能罵否乃以口血噴賊而死

孔四郎紹興人父以主簿候選京師四郎隨之亡何父死
四郎少時柔曼有鳳陽勳衛常守經者四郎在其處京師
陷賊索金守經不得乃殺之而以四郎去夜半四郎起拔
賊刀殺所與卧賊初起時度擊賊腹不中中足賊驚叫四

郎知事欺罵曰賊奴我欲殺汝不幸不能天也遂自刎死
死猶屹立不仆賊推之乃仆

都門鬻菜傭者崇禎十七年三月三十日賊奉大行皇帝
大行皇后梓宮殯於東華別殿此人慟哭觸階死人莫知
其姓氏弔之者有曰綱常千古事盡付菜傭擔

劉鳳池口口人生有氣節與人無欺長齋少嗜欲年始三
十有一甲申之變作遺言付子六斤為治命從容赴水死
家人跡之見其衣冠整然植立河中面貌如生人多為詩
文弔之

張日振新會人為農甲申之變聞威宗烈皇帝殉社稷哭
曰無皇帝矣其意以為無皇帝則自此不復有皇帝矣遂

縊死久之人問其子汝父何以遽死曰我父愚甚以無皇帝而死夫無皇帝亦何必死我父愚甚人傳以為笑

南京百川橋上乞兒崇禎十七年四月於秦淮橋上遇一士人問曰相公知北都事乎士曰哀詔已至崇禎皇帝自經矣乞兒咨嗟不已乃市酒一壺飲罷遶秦淮岸而走人

以為醉不之異乞兒放聲哭曰崇禎皇帝真死耶擗踊數

十望北叩頭赴水死市人以聞當事者為祭葬或曰卽愧

二先鹿樵紀聞作此未知孰是或曰弘光元年五月十一

日車駕出狩有乞兒題詩百川橋上曰三百年來養士朝

如何文武盡奔逃綱常留在卑田院乞丐羞存命一條遂

自縊死顧生曰嗚呼此殆所云不食嗟來以至於斯者耶

其死在十一日故其詩專為出亡者言不知後此之為文武者求其逃而不可得矣乃乞兒獨以逃自羞耶或曰長干有丐者乙酉五月之變曳杖挈瓢踰草履且哭且笑行至通濟橋植杖挂瓢脫草履投河而死人於瓢中得二詩痛傷國變語甚激烈大均曰嗟乎何乞人之多忠義也當其飢寒之時不肯為鮑焦之持蔬立槁而留其身以殉國難蓋知所重哉

河南副總兵丁啓光

鹿樵紀聞作
總督丁啓睿

有一家丁當敵至河南

啓光單騎往迎家丁控馬不使前曰將軍兄弟受國家重托不能殺敵反迎之何以為人弗聽遂投水死又提督曹存性標下有一營卒當乙酉五月敵至南京屯營洪武門

外存性將往乞降卒為前馬問曰今日之事何如存性曰
降耳卒曰公降我不降存性曰汝儕小人何知勿復言卒
呼曰我真不降也拊膺大慟投中河橋死或曰南京失守
敵索降官職名甚急安遠侯柳祚昌鹿樵紀聞
作柳昌祚倉皇懼降
不及一隸卒哭止之曰侯世受國恩此行可緩願自愛祚
昌叱之者三卒牽衣力止祚昌怒手批其頰至中河橋卒
曰侯不聽我我死矣仰天擗踊遂投河而死顧生曰春秋
時士多仕於卿大夫家卿大夫亦有與之同升者秦漢而
下稱奴僕矣士人雖甚不肖罕有廁身於此惟邊將多以
麾下壯丁因功自拔得為將軍往往有之此輩中宜有賢
者竄身其間之三人者其皆烈士而隱者歟

南京細柳街瓦匠者弘光元年五月二十四日士氏髻髮
瓦匠獨留髮人皆危之匠飲酒自若暮歸其妻強之遵令
匠佯醉許以凌晨遂中夜縊死

靈谷寺僧失其名思宗出狩秣陵人爭往孝陵伐木僧印
公宣言於眾曰吾君雖出猶有高皇帝在天之靈吾與若
受廢於茲二百餘年安可遽忘恩澤乎靈谷寺一僧奮出
奪眾斧斤眾擊之死僧函可曰嗚呼高皇帝賴是一僧矣
哭以詩曰一身殉林木國難見孤僧便與埋松下千年護
祖陵是僧既死無復有爭之者原給事中倪嘉慶泣告裨
王禁止其後洪承疇任事遂弛其禁守陵馬內監姪馬二
多方護衛因撲殺一人二毅然抵命內監尋以連結瑞昌

王遇害

王荳卿揚州人張維則之青衣也揚州陷敵入其室維則度不免屢目荳卿荳卿曰請先至鬼門關待郎遂整衣投池敵憐其姿貌拯之荳卿乘間復躍入池敵乃殺之並殺維則

歐敬竹武進人不甚識字舌短而好大言人皆笑之貧無生產浮寓城南戈橋為人修破扇餬口得錢輒醉醉即仰面捲舌而歌乙酉夏南京變聞敬竹招鄰人飲酒與相訣曰忠義祠池水至清來日我當赴之若且盡我一杯其妻提壺適至勸之曰子休矣聞舊官皆作新官安在子敬竹曰此而翁所以欲死也媪何知竟自沉死董生聞之曰嗟

乎噫嘻死者乃敬竹耶

石士鳳字仲祥

原注云一作君翔

武進人質青蚨為業閏六月朔

鬻髮令下士鳳不從臨死繫小竹牌於帶曰大明不屈義士

李玉奇宜興之市井人也江陰起義既敗以殘兵出掠敵執之曰我非盜也我乃義師之帥不可以無食而殲敵故至此耳敵欲降之曰汝誠念我當以美酒相餉酒至酣飲唱大江東去至年少周郎何處去也高聲呼敵曰斫頭去敵遂斫之

木匠湯士鰲者金壇人以不薙髮哭祭祖父投水死

蘇州玄妙觀前鬻麵人不薙髮夫婦對經死

倪文徵字舜平紹興山陰人以訓蒙貨藥為業乙酉杭州不守日夜悲號乃罄家資為酒食饗諸少年以其餘鬻二大磁缸置於祖塋之右諸少年怪之酒罷文徵躍入下缸屬諸少年以上缸覆之須臾呼使啓缸皆笑曰先生不耐煩耶曰否否適造次入缸忘坐向耳皆曰諾整襟端坐然後命之掩覆踰時往聽但聞吟誦之聲旁夜寂然乃為掩土立墓焉

王元振湖州人都御史潘某之僕也幼鬻於潘既長贖身為府吏知府某起義元振與都御史之子國瓚從事敗被執元振言國瓚無辜其家攻戰之具悉已所藏惟徵餉於國瓚耳於是國瓚父子六人得免元振弟冀脫兄死復自

首為真元振敵並殺之

黃嘉縉字季振一字樂玄江西新城人隱於醫丙戌正月十七日城破嘉縉正衣冠端坐堂上敵兵搜索寶物嘉縉笑曰架上書皆可寶也兵斫之傷嘉縉曰君子不以交亂易其志仍整衣冠端坐而死年六十有二先是甲申之變嘉縉素服悲號謂所親曰我生為聖朝民死為聖朝鬼得題明故二字於墓幸矣至是果行其言以死

畫網巾先生者不知何許人酉戌間與二僮遊於光澤

鹿樵

紀聞兩先生傳作攜二僕匿邵武山中

敵吳某聞其岸異捕之械至邵武池

鳳鳴所

兩先生傳作守將池鳳陽鳳鳴訊問不答戒部卒曰善事之但

去網巾使無惑眾焉可矣先生既索網巾無有則謂二僮

曰有筆墨乎盍為我畫諸二僮乃為先生畫網巾於額畫
已加巾幘二僮又交相畫軍中莫不譁笑呼曰畫網巾會
義師張自盛洪國玉曹大鎬李安民四營大潰鳳鳴遂詭

稱先生陣俘獻之楊名高

兩先生傳
作提督某

名高見畫網巾以為

狂笑置不問已遣詣王之綱之綱問其姓名為誰曰我忠
未報國留我姓名則辱國我智不保家留我姓名則辱家
我危亡不即致身留我姓名則辱身若曹但呼我為畫網
巾此即姓名奚問為之綱抗聲責之先生奮罵之綱令先
斬二僮群卒麾之二僮曰吾豈憚死哉顧死亦有禮當一
辭主人耳於是向先生拜且辭曰僮得効掃除地下矣欣
然就戮之綱婉謂先生曰若豈有所負耶不然殉義留名

亦何害曰吾何員員昭代耳一籌未施束手待斃其去婢

妾幾何而敢以此博節烈名乎吾蓋恥不自述也出袖中

詩卷擲於地赴秦寧之杉津引領就刃所畫網巾猶斑斑

額上觀者數千人莫不嘆息流涕諸生謝韓兩先生傳作秦寧謝生

收葬於松窠山兩先生傳作杉窠山題曰畫網巾先生之墓歲時謁

奠湯生曰嗟乎昔子路結纓子御握節義之所在雖微物

古人往往鼎呂視之先生籍一網巾以報國而二僮亦即

籍一網巾以報主真者不可得更圖其似先生之不忘其

故其遂至於斯極也耶

桐鄉村人有業蠶者某入市聞敵騎至闔戶自經死

鄞縣樵人不薙髮為歌曰髮兮髮兮白者父之精黑者母

之血兮我無髮兮何以見父母兮遂自沉死

黃賢廣州人家東郭以販油為業廣州陷久之賢不薙髮
輒販油出入敵營久之知不免告其父曰兒不能為薙髮
之人今且以不敢毀傷而死幼孤之子惟大人鞠育以繼
先祖再拜而退與妻王氏痛飲焚廬而死

馮我賓新會人丙戌十二月新會陷我賓獨不薙頭為詩
曰匹夫思報國所守在幾希自是丘山重誰言虜髮微虜
巡簡執之將行杖我賓奮起奪杖反擊之曰而無髮之偽
虜耶無髮而為天子然且不可乃僅為虜之巡簡乎虜巡
簡惡其言將以獻於主帥里人爭出金錢賄之乃縛而髡
我賓我賓憤恚不食嘔血數升以死遺言殮以大明衣冠

云

簡夙興新會人少貧自鬻於梁生梁生為人耿介尚名義城陷不肯薙髮奸人以告知縣率兵捕之將加刀杖夙興請以身代許之梁生泣曰爾代予死誠義然亦有所欲乎曰無所欲也我受主衣食十數年今已死報何憾然我嘗貸某某百錢未償主今為我償之則瞑目矣遂死

曾奉初寧都市小賈也亂後未嘗薙髮或有樂道北中事者奉初輒罵之城既破獨冠網巾衣大袖袍儼然立屋庭中騎入此之遂見殺

樊泰者番禺龍眼峒人庚寅三月敵大至以峒人饒富將藉其資糧以攻廣州數遣使往說峒人弗聽敵兵乃疾攻

之峒人故勇悍善鬪兒童十五六以下皆可揭竿冒陣父子兄弟相救護無不一以當百血戰旬餘所殺傷敵以千計會大雨火藥沾濡礮石不能發堡遂陷短兵巷戰復殺

傷

此下
原闕